

Mark ka Te Pabe'e Jesus, Te Naa Tooa'a-witu, Numu oo Tuukwena

1 ¹⁻³Nu sakwa Te Pabe'e Jesus Te Naa Tooa-witu, mu tuukwe. O'nosoo Te Pabe'e petukwu-witu, mu Te Naa yadooawabe tubotuguna yise meeoo, “Mana ka hemma nadukadu gi naa-wi'yoona sumu'yoo nana ka Te Naa pooha-toohakwi yadooakwu, ‘Mu sakwa muusoo namabetseapunne, ka Te Pabe'e pudusoo kodyu petukwuno'oto. Mu sakwa kaaheno tusooyugwepunne, o'no mu oo nakabetseanokwu.’ ”

⁴Ka saa'a sumu'yoo nana John mee naneadu ka numu baa-wi matzakadyakwe, oona ka hemma nadukadu pukwi gi naa-wi'yoona. Soo John ka mu numu ma'emukwapu, mu nanekwaha tuungu. “O'no soo Te Naa mu ma'emukwana soomu'wakwu,” mee mu netamma. Ka mu nanekwahakese, soo John yise baa-wi mu matzakakwu.

⁵Ewa'yoo numu tooe hanotoo tooe oo-baa petudyakwe.^a Umu ka suda tu tumatugupu wahana yise oo nemawunidyakwe, ka kaaheno meadabekwu mee mu tusooyugwese, soo John yise Jordan mee naneadu ka hoo-kwi mu matzakadyakwe.

⁶Soo John a puhu nagwesena namadabue-wi kwaseana, yise mokobu-ma nate'a. Kua noko nota peha natumatzu'atoona tukana. ⁷Soo John yise mee mu numu netamayakwe, “Soo Te Pabe'e pudusoo petukwu, nuga oonakwasoo unu pooha-ga'yoo, yise nuga oonakwa tuwazoo besa'yoo. ⁸Nu baa-wi mu matzaka, mu ka sutakoo po ma'wukase, ka besa'hoo podo meadabekwu. Pana soo Te Pabe'e ka Tu Besa Pooha-ma mu sootuhikwu.”

⁹O'no yise soo Te Pabe'e ka Nazareth, ka teepu Galilee mee naneadu-kooba'yoona kemmana ka John-baa petuhooga. Soo John yise ka Te Pabe'e baa-wi matzaka, ka hoodu Jordan mee naneadu-wi. ¹⁰Ka Te Pabe'e batseboogena, o poonne ka Te Naa Besa Pooha pa'anakwana

a 1:5 a Jerusalem mee naneadu-witu, ewa'yoo tuwazoo ka teepu Judea mee naneadu-witu, no'oko ka teepu-koobatu tooe, ka baa hoodu Jordan mee naneadu-kumitu tooe.

kwe'na'a tubongo punoonoekwuekedu-kwa'ne manegese oo-naga mani petu. ¹¹Soo Te Naa pa'anakwana meeoo oo netamma, “U yow Nuga Besaa Tooa, nu-kwa'ne'yoooso. Nu unu u soopedyana besa u-koobatu soonamme.”

¹²⁻¹³Soo Te Naa Besa Pooha yise ka Te Pabe'e oona numu-wanattoo taya. Soo Te Pabe'e yise ka mu nunu'u-baa watsumano (40) too'i. Soo Suta'yoo oo-baa petugase oo too'e ma'emukwa pana soo Te Pabe'e gi oo-ma naka'emukwa. Mu toha kakasa-ga'yoo ka Te Pabe'e sootummatzise soo Te Pabe'e oo-toogoo tsebooe.

¹⁴Ka John nawutumase soo Te Pabe'e ka teepu Galilee mee naneadu-kwitoo nanesootuhibu mu numu tunedyooeme'a. ¹⁵Ka mu numu meeoo netamma, “Pudusoo Te Naa noko mu numu nemadabuekwu. Mu sakwa ka sutakoo gi nakabetseapana, yise ka Te Naa besa unnepu suu'mu naka'oedyuku.”

¹⁶Waha'yoo pakwe-gadu naana, nawanga'a Andrew-no Simon mee nananeadu, ka pumma tu tuukwina ka banunadu-witoo wukwazuyakwe, oonow soo Te Pabe'e ka bakumana me'a. ¹⁷Soo Te Pabe'e meeoo mu netamma, “Mu sakwa nu-no mease e nakatzimodu mane. Nu oo mu mayugwese, mu saa'a ka mu numu nuka nakatzimodu mayugwedooa.” ¹⁸Umu nawanga'a yise ka pumma tu tuukwina ma'wuhookase, ka Te Pabe'e nagegakwate.

¹⁹Umu tzage'e soo waha'yoo nawanga'a, James-no John, ka tu naa Zebedee mee naneadu-no ka tu naa sake-wi. Umu ka pumma tu tuukwina mabetsabedyakwe. Soo Te Pabe'e ka banunadu-kumana meadabena mu poonne, ²⁰yise umu nawanga'a tuwazoo bihooka. Umu yise ka tu sake noko tu naa ma'wuhookase, Te Pabe'e nakwisoo puno memeahoo.

²¹Soo Te Pabe'e yise ka Capernaum mee naneadu-wi petuga. Nanesootuhi tabeno ka mu nanesootuhi nobe-wi petugase, ka mu numu besasoo Te Naa-witu tuukwe'e. ²²Mu numu yise ka Te Pabe'e-witu mee netamma, “Soo Te Pabe'e yow, oosoo tubetse besa ka Te Naa unnepu-witu wahadyakwe, gi ka te tunedyooedu-wa'ne'yoo.” ²³Sumu'yoo nana tsoapayidu oe. ²⁴Soo nana tsoapa-toohakwi wa'age, ka Te Pabe'e meeoo netamma, “Uda! U haa'a kadoo'oo ne mayugwekwu? U sakwa ne tsasopedya. Numme u sopedakwatoo, u Jesus, noko Hemma Manumudoopu Besaa Tooa.” ²⁵Soo Te Pabe'e ka tsoapa nematzagakwunihoo meeoo oo netamma, “Gi unnepana, mana-ga'yoona tsebooegea.” ²⁶Soo tsoapa kwebebewununa yise paba wa'akese tsebooegea. ²⁷Mu numu yise mee nananetammakoooha, “Uune'yool! Numme gi hannano'o mownnekoo poohabe poonedu. Soo Te Pabe'e puu sukwe yadooase ka tsoapa nematzagakwunihoo.” ²⁸Mu numu yise ka Te Pabe'e-witu nanatuukwe ka teepu Galilee mee naneadu-koobakwitu.

²⁹Soo Te Pabe'e yise watsukweoo tu pupua'amu-no ka mu nanesootuhi-wi'yoona mea'ase, ka Simon Peter-baa petuga. ³⁰Simon Peter yahe peawabe unu tuoeya'ena, tu tookoo unu udutu hape. Umu oo nobe-witu ka Te Pabe'e tuukwe'e. ³¹Soo Te Pabe'e yise oo-baa petugase, oo mi-makoo oo tzadyoda. Oosoo yise yotseoose, sahoose, mu tukatuungu.

³²Oogowsoo yongona tu taba egease, mu numu tuoegoedu ka Te Pabe'e-baa bi petudyakwe. ³³Tubetse ewa'yoo mu numu ka nobe-kobena sumupunne. ³⁴Soo Te Pabe'e umu numu-ma matuonase, mu no'obatusoo tuoegoedu numu mabesaku, mu tsoapagoedu tuwazoo. Soo Te Pabe'e yise gi mu unne tuungu. Soo Te Pabe'e mu tsoapagoedu gi ooka mu wahakwuna petzape, umu ka oo sopedakwadoona.

³⁵Oogow moo'a awamooa toosoo tu toganopunne soo Te Pabe'e yotsese, oona numu-wanaroo mease nanesootuha'e. ³⁶Saa'a soo Simon tu pupua'amu-no oo wateka. ³⁷Ka oo mayuse, meeoo oo netamma, "Mu numu u kwate, u sakwa kodyugasoo," mee. ³⁸Pana soo Te Pabe'e mee mu netamma, "Mu numu mana tooe nonobe-gakoo sakwa nu ka Te Naa besa unnepu mu tuukwe. Soo e pooha meeoo e netamma, 'Manatutooe mu numu ekow nanesootuhibu tunedyooe.' " ³⁹Soo Te Pabe'e oona ka teepu Galilee mee naneadu-witu ka mu numu tuukwe'e, ka mu nanesootuhi-wi'yoona.

⁴⁰Sumu'yoo nana unu tookoo uayidu, ka Te Pabe'e-baa petuga. Ka Te Pabe'e-baa petugase, nanesootuhina meeoo oo netamma, "U sakwa e mabesaku ka meeoo soonammena." ⁴¹⁻⁴²Soo Te Pabe'e Jesus oo nakasootuhise, yise oo mi-makoo oo tzamahoose, mee oo netamma, "Nu u mabesakukwu. U besa manekwu. ⁴³⁻⁴⁴Yabesoo u sakwa ka te nanesootuhiwabe petuoose oo tzapoonneku ka besa manese, yise ka Te Naa ka Moses tamme netamma-wa'nesoo, oo tzapoonneku ka u tookoo uayina namabesakuse. Pana tubetse gi ka mu numu tuukwepana ka ume e mabesakuna." ⁴⁵Pana soo nana ewow mu numu tuukwe ka Te Pabe'e-witu, yise tooe hano'yoona tooe ewa'yoo numu oo-baa petudyakwe. Soo Te Pabe'e yise kwinga'a numu-wanaroo mea, gi yise punowsoo kodyuka'a.

2 ¹Huu tabe mease, soo Te Pabe'e ka Capernaum-wi kodyu petuga. Ewa'yoo numu yise oo petugana nakow, ²yise oo-baa petudyakwe. Ka nobe kaa'no, ka natzakwuna-kobenakwi tuwazoo. Soo Te Pabe'e mu numu tunedyoo'e ka Te Naa-witu. ³Watsukwe'yoo nanana kapa-wikoo ka gi yutsungadu nana tzakwuhuna ka nobe-wi petuga. ⁴Umu ka Te Pabe'e-matoo oo tzakwuhookase sapa, ewa'yoo numu ka nobe-wi, umu gi hownnekoo oe tzoono'o'a. Umu yise ka nobe-koobatu tzatawagase, ka kapa-nokosoo tobongo oo tzakweku ka Te Pabe'e-kobenatoo. ⁵Soo Te Pabe'e oo sopedakwatoo, ka mu naana pumme mu naka'oedyukute, yise ka gi yutsungadu nana meeoo netamma, "E pua'a, nu ka u tuma'emukwana soomu'wakwu." ⁶Umu Jew numu tunedyooedu o aatadu mee sokwama, ⁷"Esoo hayoo suda na'unnedu unni. Masoogina ka Te Naa-wa'nesoo tusooyugwe, mee soonamme. Soo Te Naa suu'mu ka numu tuma'emukwana soomu'wa." ⁸⁻⁹Soo Te Pabe'e yise oo sopedakwatoo, ka mu tusooyugwena yise meeoo mu netamma, "Mu gi e naka'oedyukute nu ka mu numu tuma'emukwana soomu'wa, pana mu oo poonnekwu ka nana e mabesakuse. ¹⁰Mu yise oo sopedakwadookwu nu eka teepu-kooba ookow poohabe hee-ga'yoo, ka mu numu tuma'emukwana e soomu'wakwuna." Soo Te Pabe'e yise ka nana gi yutsungadu meeoo netamma, ¹¹"Wunuoose ka u kapa nobe-witoo tzakwuka." ¹²Soo nana yise ka tu kapa tzakwuhuna mea. No'yoona mu numu oo soo'oedyukuna meeoo,

“Te Naa tubetse besa'yoo. Numme nanabesow namanedu yaa tabeno poonne. Numme gi haanano'o yoonnekoo poohabe poonedu.”

¹³ Soo Te Pabe'e yise ka banunadu-kumabasoo petugase, ewa'yoo numu oo-baa petudyakwe. Soo Te Pabe'e ka Te Naa unnepu mu tuukwe.

¹⁴ Sumu'yoo nana Levi^b mee naneadu oonow natzakwuna-wi katuna tumasumudoodyakwe. Soo Te Pabe'e o meana oo poonne, ka o oo katu, yise meeoo oo netamma, “U sakwa umu e nakatzimodu-matu mane.” Soo Levi yotseoose, oo nageka.

¹⁵ Saa'a soo Te Pabe'e ka Levi nobe-witoo oo-no mea, umu tukaga. Ewa'yoo numu tumasumudoodu o, tuma'emukwadu mee mu Pharisee mu ne'a, umu ka Te Pabe'e nagedu yise umu-no tuka. ¹⁶ Mu Pharisee ka Te Pabe'e umu-no mu tuka mu poonnese, meeoo ka umu oo nakatzimodu netamma, “Umu mumme tunedyoedu sakwa gi suda tumatugudu numu-no tukapana, umuoo tumasumudoodu oonne'yoo.”

¹⁷ Soo Te Pabe'e ka mu nakase, mee unakwe, “Nu yaa ka teepu-kooba petu, ka mu tuma'emukwadu Te Naa-witu tuukwekwuse. Ka mu numu mooasoo kaaheno meadu mooasoo Te Naa-witu sopedakwato. Soo poohaga'yoo puu tuoegoedu numudoo suu'mu naba'e, gi ka besow numudoo, nu puu ka mu tuma'emukwadu suu'mu tummatza'e, gi ka besow numu.”

¹⁸ Susumudu numu yise ka Te Pabe'e-baa petuse mee oo netamma, “Umu John pupua'amu yise ka mu Pharisee-no mee tunetamma, ‘Numme puu gi tukapana nanesootuhiyakwe.’ How yise umu ume nakatzimodu gi punno'o oosoo tumatugu?” ¹⁹ Soo Te Pabe'e mee mu nanekwegea, “Nu togesoo yaahoo umu-no, pudu nodukwadoodu-kwa'ne, umu puu ka nanano'yoona besa sokwama. ²⁰ Pana pudusoo nu gi umu-no'yookwu, o'no yise umu e nakatzimodu gi tukapana nanesootuhikwu.

²¹⁻²² Ka oohoo a manepunne mu gi hownnekoo ka mu numu pudu tumayohope no'oko ka mumme putoogoo mooa tumayohope mayua-wa'ne'yoo. Oosoo puu wanapu nadotsana-kwa'ne. U pudu wanapu ka mooa wanapu-ma dotsanase, oosoo gi toge tubuakwu. Mu gi hownnekoo eka mumme pudu natunetammakuna ka mu mooa tumayohope noko mayua-wa'ne'yoo.”

²³ Sumu nanesootuhi tabeno, soo Te Pabe'e yise umu pumme nakatzimodu-no ona tubewabe-too me'a. Umu tseagoena ka wada-matu mabokana, oo mahangeana oo tuka. ²⁴ Mu nanesootuhidu Jew numu moohedu, Pharisee mee nananeadu, mu poonne, umu yise ka Te Pabe'e meeoo netamma, “Umu u nakatzimodu gi ka te Jew tumayohope mayoho. Umu ka wada mahangeana oo tukadyakwe, esoo nanesootuhi tabeba, gi numu hemma howyugwen'o.”

²⁵ Soo Te Pabe'e yise meeoo mu netamma, “Mu sakwa oogow nea ka o'nosoo soo besa tamme-kooba katudu, David mee naneadu, punno'o ka ne Jew tumayohope takopa, ka tu pupua'amu-no tseagoena. ²⁶ Soo David ka Te

b 2:14 Oo naa Alphaeus mee naneadu.

Naa nanesootuhi nobe-witoo mease ka tu pupua'amu-no, soo nanesootuhibu numu tunedyooedu Abiatha mee naneadu, ka pooha tukaba mu maka, umu nanesootuhibu numu tunedyooedu suu'mu tukana. Soo Te Naa yise gi hayoo mu netamma. ²⁷Soo Te Naa ka nanesootuhi tabeba nemadabue ka mu numu nasootuhi-kwi, gi sakwa mu numu o'no hemma how yugwe tuungu. ²⁸Nu yow Mu Pabe'e. Nu mu manekwuna nemadabue ka nanesootuhi tabeno.”

3 ¹O'no yise soo Te Pabe'e ka mu nanesootuhidu-baa petuga. Soo nana mi pasatopo'nepu gi miyutsengudu ka nanesootuhipe-wi. ²Mu tunesootzemadu yise ka Te Pabe'e poonnepunne how saa'a soo Te Pabe'e ka nana mi mabesaku. Umu ka Te Pabe'e how u nanesootuhi tabeno numu sootuha'e? Mee oo too'e netammakwuse. Oo wohonedu oo hoawipunne, ka gi hemma ha'oo nuugweno'o oo oo manakwe.

³Soo Te Pabe'e meeo ka nana netamma, “Yaato kemma.” Soo nana ka Te Pabe'e-baato me'ahoo. ⁴Soo Te Pabe'e ka umu pumme poonnepunnedu meeo netamma, “Ka pabow tabeba-wi gi hemma how nuugweno'o, o'no haa'a suta'yoo? Yise o'no tabeba haa'a mu gi ha'yoo oo sooyugwe? O'no haa'a mu gi namabesakukwu? O'no haa'a ka pabow mu tabebano'o, ya'e pana gi how'neyoo?” Umu yise gi tunema'yuhoo. ⁵Soo Te Pabe'e yise gi besa mu sooyukwe mu soosawikuna, gi mu numu nakasootuha'e.

Soo Te Pabe'e yise meeo oo netamma ka gi mayutsungadu, “Matuhe.” Oosoo yise matuhe, oo mi namabesakuhoopu.

⁶Mu Pharisee oe'yoona mea'ase, mu wakwawa'amu numu pabe'e pupua'amu-no oetu nehanegonno, no'yoona mee tusoo'yukwe umu sakwa Te Pabe'e batsa mee.

⁷⁻¹²Soo Te Pabe'e umu tunakatzimodu-no yise ka banunadu-kumaba petuga. Ewa'yoo mu numu, ka Te Pabe'e nakatza'e, mu tuoegoedu besa oo mayugwepu-witu nakadu tooe hano manakwanatu tooe^e, oo-matoo kemma. Mu tsoapagoedu ka Te Pabe'e-baa petuse, oo-kobena'yoona nanesootuhina meeo oo netamma, “U yahoo. U ka Mu Numu Manumudoopu Tooa,” mee. Soo Te Pabe'e yise mee mu netammadyakwe, “Mu gi meeo tuukwepana.”

Soo Te Pabe'e ka mu tunakatzimodu mee netamma, “Mu sakwa ka sake mabegapunne, nu oe meahookwu.” Mu numu ka Te Pabe'e tu tsamowkwunu petzabena, umu nanamatsagawunu.

¹³Soo Te Pabe'e yise ka giba-matoo meahoose, ka umu pumme nakatzimodu bi, ka mu netutzease. ¹⁴Sumumano wahamatsebookudu (12) umu-nagatu netutzease yise meeo mu netamma, “Mu e yadooawabe manekwudu. Nu yise

c 3:7-12 Mee nananeadu-na-kwana kemmadu: Susumudu Galilee mee naneadu-kwitu; susumudu ka Judea mee naneadu-kwitu; susumudu ka tuwazoo Jerusalem mee naneadu-kwitu; susumudu tuwazoo Idumea mee naneadu-kwitu, ka baa hoodu oenapatu, Jordan mee naneadu-kwitu; susumudu ka wakwawa'amu-manakwana, Sidon mee naneadu menakwa. Mu numu ewana ka Te Pabe'e-baa nobedugadyakwe.

nanesootuhibu mu numu mu tunedyooe tayakwu. ¹⁵Mu pooha-gana tsoapa nematzakwunikwu.” ¹⁶Umu oo yadooawabe mee nanane'a Simon, soo Te Pabe'e Peter meeoo oo neahoo, ¹⁷James tu wannga'a John-no, mu naa Zebedee mee naneadu. Soo Te Pabe'e ka James noko John Nunuadu-kwa'ne mee mu ne'a. ¹⁸Andrew, Philip, Bartholomew, Matthew, Thomas, James, oo naa Alphaeus mee naneadu, Thaddeus, Simon, ka Cana mee naneadu-wi'yoona kemmadu, ¹⁹soo Judas punno'o saa'a oobenakwa tukwutumadu ka Te Pabe'e-matoo bika.

²⁰Soo Te Pabe'e tu nobe-wi kodyu petuga. Mu numu yise ka nobe-wi ewa mani petuga, soo Te Pabe'e ka umu tunakatzimodu-no mu mabetseana, gi oosapa tuka. ²¹Mu nanumu gi oo manena nakana, umu yise meeoo sokwama, “Esoo emukwa. Numme sakwa nobe-witoo oo tzakaka,” mee.

²²Mu Jew numu nanesootuhiwabe ka Jerusalem-wi'yoona kemma'ase, ka Te Pabe'e-baa petugase, ka Te Pabe'e nesootzemana meeoo, “Oosoo numu poohadu. Oosoo sutakoo pooha-gana ka tsoapa nematzagakwunidyakwe.”

²³Soo Te Pabe'e yise meeoo mu netamma, “Sutakoo u pooha-gana gi hownnekoo tsoapa nematzagakwuni-kwa'ne'yoo. ²⁴Ka yoonnekoo, mu numu sukwe nanayadoena, gi hownnekoo hemma nemamakwu ewa nanatumoo'oo.

²⁵Mu naanapua'amu sukwe nanahase gi hemma nemamakwu-wa'ne'yoo.

²⁶Mu numu poohadu naduyadu sutakoo pooha-ga'yoo, gi hownnekoosoo sutakoo nematzagakwuni-wa'ne'yoo. Mu sutakoo pooha-ga'yoo gi puusoo tu nanagoena petzape. ²⁷Nu ka sutakoo oonnakwa unu pooha-ga'yoo, yise nu tuwazoo unu nazoo'e. Nu mu mesoo matzooekute. ²⁸Ka no'oko suda te tumatugupu soo Te Naa kadoo'oo mayugwekwu, ka ooka te nekwae. Ka Te Naa-witu gi suda netammapana tuwazoo. ²⁹Pana ka ooka Te Naa Besa Pooha suta'yoo mee netammadu, soo Te Naa gi oo soomu'wakwu.” ³⁰Mee soo Te Pabe'e mu netamma, ka tu Besa Pooha mu nesootze'ma.

³¹Soo Te Pabe'e pea-no oo wannga'amu yise petugonno, obe puuwana konno ka oo yadooadyakwe.

³²Ewa'yoo mu numu oo nana'oonnakwi aatadu meeoo oo netamma, “U pea-no u wannga'amu obe puuwana'yoona u-no neyadoo'a.” ³³Soo Te Pabe'e meeoo mu nanekwegea, “Haga e pea-no e kwangamu?” ³⁴Ka umu tu na'oonnakwi aatadu poonnese meeoo mu netamma, “Mu suu'mu yaatu e nanumu. ³⁵Mu ka E Naa te pa'anakwatu nakabetseana, no'yoona mu ka E Naa nakabetseana, e tubetse nanumu.”

4 ¹Soo Te Pabe'e ka banunadu-kumaba'yoona mu numu tunedyoo'e.

Ewa'yoo mu numu oo na'ena-kwi manepunne, soo Te Pabe'e yise ka sake-wi tseboose oe katu; mu numu yise ka banunadu-kumaba konno. ²O'no soo Te Pabe'e ewa mu numu tunedyooena, meeoo mu tuukwe'e, ³“E nakapunne, sumu'yoo nana ka tubewabe-wi tumasu'a. ⁴Susumudu soo oo pooe tumasuamatu ka a nadapodo-witoo sawemena, mu hootseba'a yise mu soo'a.

⁵Susumudu soo oo pooe punno'o unu tupe-ga-nagatoo sa'we, gi tookapu teepu-ga-witoo. Umu yabesoo naahoose sapa, ⁶soo taba mu koopasakuhoo, umu ka

gi tookapatoo tuna-gana. ⁷Susumudu tsa'abu-nagatoo sawe meana, naa pana mu tsa'abu ewa naana mu tatsatsebooa. ⁸Susumudu besow teepu-koobattoo sawehoose besa na'a. Umu tumasape ewa poodeo'a." ⁹Soo Te Pabe'e yise mu numu meeoo netamma, "Mu sakwa e nakapunne, mu ka besow naka-gana."

¹⁰Umu Te Pabe'e nakatzimodu mu numu-no ka Te Pabe'e-baa petugase, mee'e oo tubenga, "Ha'oo manena u mu numu natugwe'nga?" ¹¹Soo Te Pabe'e yise mu nekwegease mee unakwe, "Mu e nakatzimodu moosoo nasootuhipu. Mu moosoo oo nakasopedakwadoo, ka Te Naa unnepu. Mu nasootuhipu, pana mu numu gisoo ookow nasootuha'e, ooonne'yoona nu meeoo mu natugwengakatu Te Naa nuka tunetammakuna.

¹²'Mu oosapa ka Te Naa besa unnepu nakamo, pana gi oo soonaka'oedyukute. Mu tuwazoo tooe oo poonne pana gi oo soonakasopedakwadoo. Mu sakwa ka mumme oo tuukwena naka'oedyukuna, mu poonnena nakasopedakwadoona, o'no sakwa mu nu-matoo kemmase, nu yise mu sootuhikwu.'

¹³Mu haa'a ka nuga natuukwepu sopedakwadoo? Ha'oo yise mu ka ekow na'unnepu mumme e tuukwe'e gi oo nakasopedakwattoo?

¹⁴Soo Te Naa yadooana ka numu tumasu'a-kwa'ne'yoo. Soo numu yise ka teepu-wa'ne'yoo. ¹⁵Soo numu ka teepuna tumasu'ana, susumu-kwi gi besa na'a. Soo numu ka Te Naa yadooana gi oo naka'oedyukute. Soo gi toge'yoo yise mu numu tza'emukwa. Mu natza'emukwadu yise ka po-koobattoo sawetu-wa'ne'yoo.

¹⁶Susumudu numu ooonne'yoo gi tunagadu-kwa'ne'yoo. Ka mooe'ugasoo susumudu besa sokwamana pumme tu nesootze'ma ¹⁷yabesoo ka Te Naa yadooana soomu'wa.

¹⁸⁻¹⁹Susumudu numu ka teepuna naadu, tsa'abu-wa'ne'yoo. Soo ooonne'yoo numu ewa tu hee-gana petukute. Ka tsa'abu-wa'ne'yoo yabesoo ewa'a, yise ka Te Naa yadooana gi naka'oedyukute.

²⁰Susumudu soo numu besa tumasu'a, ka besow teepu-wi. Ewa'yoo mu numu tunaka'oedyukudu manekwu, tamme ka Te Naa besa unnepu mu tuukwena."

²¹Soo Te Pabe'e yise mee mu netamma, "Tugootabuagunoo gi he-tooha sukwe nuunadu. Pa'a'yoona mu gootabuakupunnena, yise no'oko hemma gootabuakute. Soo e natugwengapu tugootabuagunoo-kwa'nesoo. ²²Umu-wa'nekoosoo nu ka Te Naa-witu mu tunesootabuedooa. ²³⁻²⁵Mu e naka'oedyukudu tubetse unu sokwamakwu, mumme e tuukwe-kwa'ne, mu yise unusoo besa tusopedakwadookwu. Mu gi e nakabetseadu no'oko oo soomu'wakwu."

²⁶Soo Te Pabe'e meeoo mu netamma, "Mu numu ka Te Naa unnepu-witu nakase e naka'oedyukudooa. Oosapa mu manemokwu tumasu'ape-kwa'ne. Sumu'yoo nana puu ka tubewabe-wi wahabu masu'ase, ²⁷⁻²⁸oosoo puu gi nasootabue yabesoo na'a. Tooe togano, tooe tabeno tooe, yabesoo na'a. Oo naa tabu'ana, tamme gi sopedakwattoo.

²⁹Naakese, pa'a wunukese, yise ka naa makwuse, nakutadu."

³⁰ Soo Te Pabe'e yise meeo, “Mu ka e naka'oedyukuna ewa manese nu mu tuukwekwu. Meno'o huutse'yoosoo numu E Naa-wi tunaka'oedyute, ³¹ atsapooe-kwa'ne. Atsapooe tuutse'yoo ka namasuana, ³² oosoo puu pa'a naakese kwasu, mu hootseba'a yise oo-naga nobe-too.”

³³⁻³⁴ Soo Te Pabe'e ewow numu nanatuukwe'e, hemma mu nakasopedakwatoow-kwikoo, yise saa'a soo Te Pabe'e ka nanatugwengapu tu nakatzimodu watse tunesootabuedooa.

³⁵ Ka tu yongokese, soo Te Pabe'e yise mu pumme nakatzimodu mee netamma, “Tamme ka banunadu oenapatoo meakwu.” ³⁶ Mu oo nakatzimodu mu numu ewatoo mease, ka Te Pabe'e-baa sake-wi tzoonoose ka baa natzemangea. Susumudu ka sake-wi umu-no. ³⁷ Unu hukwa petuse, baa ka sake-wi bakaanoho. ³⁸ Soo Te Pabe'e ka sake oonnakwa habeno'o tu mi tzopedanena, atasoo u'wedape. Mu oo nakatzimodu suina, yise oo netupoonnese, mee oo netamma, “Ha'yoo u ne soobedya? How sakwa u ka ne badatu'ihoose?” ³⁹ Soo Te Pabe'e ka hukwapa noko baa yadoese, “Obeda sapa,” mee unne. Gi hukwa manise, gi hee yutsungapunne.

⁴⁰ Soo Te Pabe'e ka umu tunakatzimodu meeo netamma, “Mu sakwa gi unu su'ipana, gisoo mu nuka togesoobedya.” ⁴¹ Umu yise meeo nananetamma, “Haga esoo nana? Soo hukwapa ka baa-no a nakabetsea.”

5 ¹ Soo Te Pabe'e ka mu tunakatzimodu-no ka Gerase mee naneadu-kwitoo natzemange petuga. ²⁻⁴ Soo Te Pabe'e ka sake-wi'yoona tseboekase, sumu'yoo nana tsoapayidu oo tapoegea. Esoo nana ka tupe tawaga-wi nobega'yoo mu tu'ipu nakoo-kwi. Ewasoo oo mi-no oo kowpa natzakunedi'yakwe. Nonotsa yise soo nana oo mesoo tzahanekwunihooyakwe. Gadoo'oo haga natzooedu oo wutama-wa'ne'yoo. ⁵ Soo nana nonotsa tabeno, tooetoo togano, tooe hano tooe oona manennumme mu tu'ipu natuoonakwi, tooetoo gibanagakwi wa'agenumme, puusoo ka tupe-ma natzebokana. ⁶ Oosoo yise ka Te Pabe'e poonnese oo-baa tanomanepetoo. ⁷⁻⁸ Soo Te Pabe'e yise meeo oo netamma, “U tsoapa mana-ga'yoo tseboegee.” Soo tsoapa yise meeo oo netamma, “How yise u nukadooe? Numme u sopedakwatoow. U Jesus, Numu Manumudoopu Tooa'a. Gi numme makadoo'ookupana.” ⁹ Soo Te Pabe'e ka nana meeo tubenga, “Ha'yoo u nane'a?” Soo tsoapa oo nanekwege'a, “Ka ewa'yoona numme, numme ewa nanane'a.” ¹⁰ Umu tsoapa ewana meeo oo netamma, “Gi ne tayapana ekow teepu-koobakoo.”

¹¹ Ewa'yoo mu hogu ka giba-kumaba tuka konnomo'o. ¹² Umu tsoapa yise meeo ka Te Pabe'e netamma, “U sakwa mu hogu-nagatoo ne taya.” ¹³ Soo Te Pabe'e yise meeo mu netamma, “Muusoo too'e.” Mu tsoapa yise ka mu hoganaga mani. Mu hogu ka banunadu-kwi badatu'ihoo. ¹⁴⁻¹⁶ Mu naana yaatu, mu hogu mabetseadu ka mu hogu badatu'ihoose, mu naana nana'emota tatanomane, ka mu numu yise tuukwe'e. Umu no'yoona kemmase oo poonne. Pudusoo yise ewa'yoo numu ka Te Pabe'e-baa mani petu. Soo nana

soonamme-kwitu besa manese, oosoo yise onow katu, tu hekwi namasooana. ¹⁷Ewa'yoo mu numu ka Te Pabe'e-ma nasooa yise oo tayakwuna'e.

¹⁸Ka Te Pabe'e ka sake-wi tseboodyakwe, soo nana ka Te Pabe'e meeoo netamma, “Nu u-no meakwu.” ¹⁹Soo Te Pabe'e yise meeoo ka nana netamma, “U sakwa gi nu-no meapana, u sakwa u nanumu-witoo kodyu. Te Naa besa ume tumadukugana mu tuukwe.” ²⁰Soo nana yise kodyuka, ka teepu Sumumano (10) mee naneadu-kwitoo. No'yoona mu numu oo nakadu besa nakasokwama.

²¹Soo Te Pabe'e ka banunadu mana-kwi nummese, ewa'yoo numu oo-baa manega'a. ²²Oosoo nana mu nanesootuhidu nematugudu, Jairus mee naneadu, ka Te Pabe'e-kobena meatzedo petuse ²³mee oo netamma, “E padu unu tuoeya'e. U sakwa yabe kemmase, oo-kooba pooha matuguse, oosoo sakwa besa manese, besa nuumma.” ²⁴Soo Te Pabe'e yise oo-no mea. Ewa'yoo numu umu-no oo takoo'negea'a.

²⁵Sumu'yoo mogo'ne hoone tuoeya'edu sumumano wahamatseboekudu (12) tommo petuga. ²⁶Mu poopooha-ga'yoo gi besa oo mayugwe. Oosoo yise no'oko tu hemma tzasoo'a petuga. Nahanobasoo manemena, yise hanobasoo manepetuga. ²⁷Oosoo yise ooka Te Pabe'e-witu nakase, oo oonakwana oo kwasu tzamow, mee tosoohanena, ²⁸“Nu sakwa oo kwasu sukwe tzamase, besa mane.”

²⁹Ka oo tzamase, soo oo puuhana yise pasahoo. Oo tookoo yise no'yoona besa nuumma, ka besa manese. ³⁰Soo Te Pabe'e yise yabesoo tu poohamatu yaahoose, oo sopedakwatoose umu-tamme nakwumunase, yise meeoo unne, “Haga e tzamow?” ³¹Umu oo nakatzimodu meeoo oo netamma, “Ewa'yoo numu u takoo'napunne. U yise meeoo, ‘Haga e tzamow?’ ” mee. ³²Soo Te Pabe'e yaatu poohnamoo'ase, oo poonne ka oo manedu.

³³Oosoo mogo'ne yise su'ise kwebewunu. Ka tu manena sopedakwatoose, o'no yise ka Te Pabe'e-matoo kemmase oo nanekwahakute. ³⁴Soo Te Pabe'e mee oo netamma, “U ka e naka'oedyukuna besa manese, saa'a mea.”

³⁵Ka Te Pabe'e togesoo yadooawunu, oona ka Jairus nobe-wi'yoona kemmadu meeoo tuukwe'e, “U padu ya'eoo, gi ka Jesus u nobe-witoo bipana. Nagutza saa'asoo.” ³⁶Soo Te Pabe'e oo nakase ka Jairus mee netamma, “Gi su'ipana. E nakabetsea.” ³⁷Soo Te Pabe'e yise ka Jairus-no oo nobe-witoo memekwate. Peter, James, John suu'mu umu-no ka Jairus nobe-witoo mea'a, meeoo susumudu nakatzimodu mu netamma, “Gi kemmapana numme-no.”

³⁸Ka oonow mu petugase mu numu ewa'yoona sakwa'e. ³⁹Soo Te Pabe'e yise ka nobe-wi egease, meeoo mu netamma, “Gi sakwipana. Esoo tsea'a gi ya'e, sukwe u'we.” ⁴⁰Umu oo-ma'yoo naneko'e. Soo Te Pabe'e yise puuwanatoo mu taya. Ka tsea'a naanapua'amu-no ka umu punotu bina ka tsea'a habekwitoo mea'a. ⁴¹Soo Te Pabe'e yise ka tsea'a-matoo takwuese, oo mi-ma tzakaduse, meeoo oo netamma, “Yotseoo.” ⁴²Soo tsea'a wahamatseboekute (12) tomopu, yise tuponnese, yabesoo yotseoose, wununnumme. Mu numu otu oo poonedu hayoo sapa sokwamahoo. ⁴³Soo Te Pabe'e ka tsea'a



Soo Te Pabe'e ka tsua'a mabesaku (Mark 5.41)

naanapua'amu meeoo netamma, “Hemma manatu a maka.” Soo Te Pabe'e meeoo mu tunetammakute, “Gi haka tuukwepana kayoo e tumadukuse.”

6 ¹Soo Te Pabe'e umu tu nakatzimodu-nosoo ka Jairus nobe-wi'yoona tu nanumu-witoosoo kodyu petuga. ²Ka nanesootuhi tabeba oo manepetuse, soo Te Pabe'e numu-baa nanesootuhi petuga, ka mu numu besasoo Te Naa-witu tuukwe'e. Ewa'yoo numu oe oo nakapunne, meeoo nananetamma, “Soo Jesus besa yadoo, pana oosoo tamme-nagatusoo. Ha'oo yise esoo Jesus ka ekow yoonnekoo nageapu, Te Naa-witu tu sopedakwadoona? ³Esoo nana uga nobe-doodu yise yaa meno'o unu tu pooha-gana te tzapoonnekute. Tamme oo sopedakwadoo, oosoo Mary toa. Mu James, Joseph, Judas, Simon yise oo wanga'amu. Yise oo punne'emu yow tamme-naga.” Yise umu gi ka Te Pabe'e naka'oedyukute.

⁴Soo Te Pabe'e mee mu netamma, “Ka yaa teepu-koobatu mu numu ka Te Naa yadooawabe naka'oedyukudu, yise umu oogowsoo nanumu, oo nonopua'amu-no gi.” ⁵Soo Te Pabe'e ka mu susumudu numu tuoegoedu-ma matuoota yise mu mabesaku. Huutse'yoo numu namabesaku, umu ka gi tunaka'oedyukuna. ⁶Te Pabe'e tutuha tu nanumu soobedya ka mu too'e tuukwese sapa, gi pumme mu naka'oedyukute.

Soo Te Pabe'e yise oona tzatzage'e-kwisoo nanesootuhibu numu tunedyooennumme.

⁷Soo Te Pabe'e yise mu wahamatseboekudu (12) tu nakatzimodu bise, meeoo mu netamma, “Nu mu pooha-makakwu, puma tsoapa mu nematzagakwunikwuna. Wakwaha'yoona saa'a gi hemma hemapana memea. ⁸Gi nadukadu tunopana, gi mago'o, gi puma hemma mu tumukwuna tuwazoo hemapana. ⁹Gi waahoo kwasu hemapana. Sumu-kwisoo tanegeana tuwow.

¹⁰Ka mooe'ugasoo tunaka'oedyukudu nobe-wi egease, ooweoo umu-baa tooi, gi oonatooe tooinnummepana. ¹¹Yise ka mu numu gi mumme naka'oedyukudu gi mu nobe-wi egeapana. Ka kooseba mu moko-matu tata'nese, oe'yoona saa'a memea. Mu numu tzapoonneku how suta'yoo tookwa umuoo numu."

¹²Mu tunakatzimodu yise mea'ase, meeoo mu numu tuukwe me'a, "Gi suda manepana." ¹³Yise ewow tsoapa nematzagakwunimena. Ewa'yoo mu numu tuoegoedu yoohoo, namagunana besa manakwe.

¹⁴⁻¹⁶Ewa'yoo numu ka Te Pabe'e-witu nesoobedya. Susumudu numu meeoo, "Masoo sumuna soo John numu baa-wi matzakadu, tuusootabuese, unu poohadoo." Susumudu numu meeoo oosoo ka sumuna Elijah. Susumudu punno'o meeoo, "Oosoo Jesus ka sumuna Te Naa-witu wahadu."

Mu numu pabe'e Herod mee naneadu, ka Te Pabe'e-witu nakase, yise meeoo, "Nu tukwutumadu ka John batsa tuungu. Oosoo yise sumuna tuusootabuepu?" ¹⁷Ka o'nosoo, soo Herod tu pabe'e nodukwa nodukwadoo, soo mogo'ne Herodias mee nane'a. ¹⁸Soo John ka Herod meeoo netamano'o, "Gi toge u manakwe, gi ka Herodias nodukwadoopana."

¹⁹Soo Herodias unu sutana ka Herod ka John too'e batsa tuungu. ²⁰Soo Herod yise ka John tu batsakwu-ma unu sua'e, ka John nanesootuhidu nana. Mu tukwutumadu ka John wutumow. Soo Herod besa ka John nakasoobedya pana oo yadoo-ma nakasua'e.

²¹Yise gea'a soo Herod tu nadoo'aadoono'o tabeno mu numu papabe'emu-no ewa tuka. ²²⁻²³Herodias padu tukawunuse yise mu numu nugakute. No'yoona yise oo nugana besa soobedya. Soo Herod mee oo netamma, "Hemma u? Tooe hemmadoo u soogwina nu u gea'akwu." ²⁴Soo tsuadumu tu pea tubenga, ²⁵"Hemma sakwa yise nu natuungu?" Yise soo oo pea meeoo oo netamma, "Ka John koota tsekowse, ka oo wo hanese, yise tseda-wi oo wuuna." ²⁶Soo Herod oo nesootu'adya'e ka oo batsa tuunguse, ewa mu numu oo unnena naka. ²⁷Herod yise ka mu tukwutumadu ka John koota tsekea'a tuungu, ²⁸ka oo wo tseda-wi oo wuunase, ka Herodias yise yongagea. ²⁹Mu John nakatzimodu oo nakase yise oo tookoo tugudooa.

³⁰Umu Te Pabe'e nakatzimodu oo-baatoosoo kodyuse, ka Te Pabe'e no'oko ka tu manemopu-witu oo tuukwe. ³¹Soo Te Pabe'e meeoo mu netamma, "Tamme sakwa gi haa'no songapangapunne." Ewa'yoo numu pooha namagunana meagonno, gi tu tuka-ma sokwamana manegonno. ³²Soo Te Pabe'e yise umu tu nakatzimodu-no ka sake-wi, gi numu pumme poonne-kwitoo mea'a.

³³Mu numu mu mea'ase, mu poonne. Ewa'yoo mu numu mu posoopedakwadoona oo nanatuukwe ka baa-kumi mu mea tu no'ata-kwi'yoona umu yise oo-baa sogo tatanomanepetuga.

³⁴Soo Te Pabe'e yise ka sake-wi'yoona wue petuga ka baa-kumabato, ewa'yoo mu numu o, pukwi oo petuga-kwi. Mu numu sukwe mukwadu-kwa'ne mu posoobedya, mu sootuhina yise mu tunedyoo'e.

³⁵Yabesoo yise taba egaga'a, ³⁶mu tunakatzimodu ka Te Pabe'e meeoo netamma, "U sakwa mu ta'ya ka kwaya'yoona mu kemma'ase. Umu sakwa puusoo tu tukakwuna hownnekoo mayu." ³⁷Soo Te Pabe'e yise meeoo mu netamma, "Hemma sakwa tamme mu maka?" Mu tunakatzimodu yise meeoo, "Numme haa'a ka tukapu tumukwu? Ewa'yoo numu yaatu. Hanoko sakwa yise numme ka tukapu mu mayuku?" ³⁸Soo Te Pabe'e yise meeoo mu netamma, "Huuhoon mu tukaba-ga'yoo? Mu sakwa oo poonnetooa." Ka saa'a umu tunakatzimodu meeoo oo netamma, "Manegeoo numme tukaba-ga'yoo. Yise waahoo tuwazoo numme pakwe-ga'yoo."

³⁹⁻⁴⁰Soo Te Pabe'e meeoo ka mu tunakatzimodu, "Maa poohega-kooba sapa mu numu aata tuungu. Yoode'a, mu sakwa mu toonooba-wisoo aata." ⁴¹Soo Te Pabe'e yise ka mu aatahoose, ka tukaba, noko pakwe hemahoose, toogopadu poonnese, nanesootuhikooha. Yise ka tukaba noko pakwe tزابokase, umu pumme nakatzimodu, mu ewow numu maka tuungu. ⁴²⁻⁴⁴Yise ewow numu maka (5000 nanana). Ka nanesootuhina ka tukaba noko pakwe toge'yookwunu ka mu numudoo negwa'e, umu yise ewa tukase, no'yoona wutzu'me. Mu Te Pabe'e nakatzimodu yise ooka pakwe, noko tukaba nagupenina ka wahamatseboekudu (12) kawono, oo-ma kaanoku.

⁴⁵Soo Te Pabe'e yise umu pumme nakatzimodu meeoo netamma, "Mu sakwa ka sake-wi kodyu, ka banunadu natzemangegase, yise ooka Bethsaida mee naneadu-kwitoo kodyuka. Mu numu ewana yise nu tayakwu." ⁴⁶Yise ka mu mea'ase soo Te Pabe'e ka giba-matoo mea, ka nanesootuhikwuse.

⁴⁷⁻⁴⁸Ka yongona, ka sake-wi ka banunadu banaamoo-kwitoo, soo Te Pabe'e no'oko mu poonne. How gi besa natzemange, ka kwenahadu unu hukwawunu. O'no awamooasoo tu tabu'agena, soo Te Pabe'e ka banunudu-koobakwi kemmaka'e. Soo Te Pabe'e yise umu moopa too'e meahoo. ⁴⁹⁻⁵⁰Mu tunakatzimodu oo poonnese unu suise, yise wa'agemo'o, "Uda tsoapa." Soo Te Pabe'e mu yadooe, "Gi suipana. Nu yaahoo." ⁵¹⁻⁵²Ka sake-wi umu-baa tseboose, yise soo hukwapa kadoo manigea'a. Umu oo nakatzimodu gi gea'a oo pooha manena nakasopedakwadoona ka manegeoo tukaba nagoohanena, waahoo pakwe tuwow. Ka ewow numu oo makana poonne pana gi oo soo'oedyukute.

⁵³Ka Gennesaret mee naneadu-kwi umu natzemange petuse, tu sake o tzakuna, ⁵⁴oe'yoona yise sawe. Mu numu ewana nosumuna ka oo nesopedakwatoona ⁵⁵oo nanatuukwe. Umu nanatuukwewunudu, mu tuoegoedu, mu nuummadu oo-baa bi petudyakwe. Susumudu oo-baa natzahedape petu. ⁵⁶Umu yise Te Pabe'e kwasu-matu tzamase, no'yoona besa mane.

7 ¹Mu Jew numu nananesootuhipe papabe'e numu tunedyoedu ka mu Pharisee mee naneadu-nagatu kemmana, ka Jerusalem mee naneadu-kwi'yoona kemmase, ka Te Pabe'e-baa. ²Umu ka Te Pabe'e nakatzimodu poonne, umu gisoo mabatzagapana tukagonno. ³Umu Jew-no Pharisee tumayohope-wi umu gi tuka ka gisoo mabatzagana ka tu nanamooatupu tumayohope. ⁴Umu ka hano mose tu tootsa mabatzakwuna'e. Tu tseda,

pukwikoo tu saakwuna, batzakase oekoo saakwu. Ne nanamooatupu mee ne tunetammakuna, numme yise oo mayoho.

⁵Umu Jew tuukwewabe, mu Pharisee-no, ka Te Pabe'e meeoo netamma, “Mu u nakatzimodu sagwane ma'emukwapu-ga'yoo, gi tu mi mabatzakapana tuka. Umu te nanamooatupu ka tu nanumu meeoo netamma namabatzakase yise tuka.” ⁶Soo Te Pabe'e yise meeoo mu netamma, “How yise mu ka te nanamooatu besa nakana, gi Te Naa tuukwewabe naka? Soo Isaiah, ka mumme nemooagadu-witu meeoo unnepu.

‘Mu ka Te Naa nakabetse'a mee mu naneyakwe.’

Soo o'nosoo Te Naa yadooawabe togesapa mu netamma ka mee tubotuguna.

‘Umu numu meeoo unnepana mu tupa apeakana, gi mu tubetse sokwamana.

Umu ka Te Naa gi nakabetse'a. ⁷Umu ka Te Naa-matoo nanesootuha'e mee sukwe naneyugwepana, ka mu numu aata-tammesoo ne'emukwakute, ka pummesoo tusooyugwena mu numu ewana mee netamma, “E nakapunne pummesoo tumayohope tumayoho o'no mu ka Te Naa nakabetse'a.”

⁸Umu mee'e mu nanamooatu mu Te Naa unnepu-wa'nesoo.” ⁹Soo Te Pabe'e yise meeoo mu netamma, “Mu sakwa gi umu te nanamooatupu tuukwena naka'oedyukupana. Mu sakwa Te Naa suu'mu naka'oedyuku. ¹⁰Ka mooasoo soo Moses meeoo unnepu, ‘Te Naa noko ka numu tu naanapua'amu mabetsea tuungu. Soo tu naanapua'amu suda netammadu sakwa nabatsa.’ ¹¹⁻¹²Mumme putooogo mooa tumayohona pana mu meeoo, tamme sumuna ka mu naanapua'amu mee netammakwu, ‘Nu ka Te Naa God tummatzi, gi umu e naanapua'amu tummatza'e.’ Mu gi besa ka mu naanapua'amu matugu, ka oo tumatuguna. Mu ka Te Naa tunetamma takopa, ka mu te nanamooatupu tumayohope oosapa nagen. ¹³Ewa'yooosoo te nanamooatupu unnepu mu numu ka gi besow tunedyooe, tamme sakwa ka Te Naa tuukwena suu'mu naka'oedyuku.” ¹⁴Soo Te Pabe'e yise meeoo mu ewa-kwikoo mu numu netamma. ¹⁵⁻¹⁶“Mu sakwa e nakasopedakwato, soo hemma mu tukana gi hownne'yoo, Te Naa-nakwana. Soo suda te tumatuguna yise gi besa te soonammena yugwe, umuoo soo Te Naa gi petzape,” mee.

¹⁷Ka nobe-wi'yoona mu tunakatzimodu meeoo ka Te Pabe'e tubenga, “Ha'yoo u ka mu numu tuukwepu?” mee. ¹⁸⁻¹⁹Soo Te Pabe'e meeoo mu nanekwege'a, “Mu sakwa o'nosoo e nakasopedakwato. Soo toee hemma toee te tukana gi hownne'yoo Te Naa-nakwana. Soo tukapu gi atasoo numu yugwe-wa'ne'yoo. Soo tukapu numu-nagakwi sukwe meadu.” Soo Te Pabe'e yise te tzapoonnekute toee hownne'yoo numu tukapu besa'yoo. ²⁰“Ka suda te tumatuguna soo Te Naa gi petzape. ²¹No'obatusoo suda te tusooyugwena, tuduhana, tubatsana, ²²moogoobuna, numu mooagana, numu nowuakuna. Kumma'akusoo nasoodyagena, numu nesootzemana, besa nasooyugwena, ²³oonnekoo soo Te Naa gi petzape.”

²⁴Soo Te Pabe'e yise oona tubewa-wi, Tyre mee naneadu-kumaba, ka nobe-wi watze petuga, gi haga oo sopedakwato. Mu numu puusoo yise oo mayuoo.

25-26 Yise sumu'yoo wawa'a mogo'ne oo-baa petu. Ka Te Pabe'e-witu nakase ka tu padu tsoapaya'e ooka oo nematzagakwuni tuunguna. 27 So Te Pabe'e yise oo nemapoonnena mee oo netamma, "Gi nu wawa'a sootummatza'e. Nuga nanumu suu'mu sakwa nu tummatzi. Numme Jew mu wakwawa'a sadu'u mee ne'a. 'Yoo manepunne mu numu puu gi tu dooamu tukakwuna tu sadu'u maka." 28 So wawa'a mogo'ne yise mee oo netamma, "Mu te dooamu puu tu tugupenina sadu'u maka. U sakwa nuga padu mabesaku u nanumu too," mee. 29 So Te Pabe'e yise ka wawa'a mogo'ne meeo netamma, "Aha, besa'yoo u ka meeo unnena, nu u tummatzikwu. U nobe-witoo kodyuka ka tsoapa nu mooasoo nematzagakwunipu." 30 So mogo'ne ka kodyu petugase, ka tu padu besa manepu, ka tu kapa-kooba oo habennumme oo mayuoo petuga.

31 So Te Pabe'e yise ka Tyre mee naneadu-nakwana kodyuna ka Galilee banunadu-witoo mea. So Te Pabe'e yise ka Sidon mee naneadu-toogoo me'a. Ka teepu Sumumano'o Nogatudu mee naneadu.

32 Onona mu numu ka Te Pabe'e-baa sumuoo nana bi petu. Oosoo nana gi nakatawagadu, gi besa yadooadu tuwazoo. Mu numu ka Te Pabe'e meeo netamma, "U sakwa namekoosoo u mi-makooba matuoonase, eka nana mabesaku."

33 So Te Pabe'e yise ka nana bihooka mu numu ewanagakoo. So Te Pabe'e yise tu makoogoo ka nana naka-wi tsetuoonahoo. Ka tu makoogoo tu huutse-ma mobanase, ka nana ego-kooba tsetugu. 34 Yise so Te Pabe'e toogopadu poonne. Nasongapose ka nana gi nakatawagadu meeo netamma, "Yise nakatawaga." 35 So nana nakatawaga manese, besa yadoo mani.

36 So Te Pabe'e yise meeo mu numu netamma, "Gi sakwa mu haka tuukwepana," pana mu numu gi oo nakabetseana oo nanatuukwe'e. 37 Umu meeo, "Uune! So Te Pabe'e unu tumada'e. So Te Pabe'e ka mu gi nakatawagadu nakadage ma'eyakwe, mu gi apegeadu besa apegea maneyakwe."

8 1 Mu numu ewana sumuna tusooase, gi hemma tuka, so Te Pabe'e meeo mu tu nakatzimodu netamma, 2 "Nu suda umu numu nuummakute, ka pahe tabeno gi hemma mu tuka, umu tseago'e. 3 Nu ka nobe-witoo mu tayase, umu sumuna tsuawumehoekwu, umu-matu ka kwinga'a kemmase." 4 Umu oo nakatzimodu yise meeo oo nanekwegea, "Ka tubetse numu-wana'yoona hownnekoo tamme ka nadukatu umutoo mayukwu?" 5 So Te Pabe'e yise meeo mu tubenga, "Haa'noko mu tukaba-ga'yoo?" Mu oo nakatzimodu yise meeo, "Natakwatsukwu'yoo (7) tukaba." 6 So Te Pabe'e yise mu numu meeo netamma, "Ma teepuna sapa aatapunne." O'no yise ka tukaba hanese, oo-koobattoo nanesootuhise oo tzbokase, mu tu nakatzimodu mu numu ooka haneku tuungu, umu yise ka tukaba mu numu ewana haneku. 7 Umu yise tuwazoo huutsekoo tutugutzekoo pakwe-ga'yoo; ka pakwe tuwazoo nanesootuhikuse mu tu nakatzimodu mu numu haneku tuungu. 8 Mu numu yise ka tukase wutzumeoose, ka tunakatzimodu natakwatsukwuoo (7) kawona-witoo ooka a nagupenina tzoa. 9 Tubetse ewa'yoo (4000) numu o. 10 So Te Pabe'e yise mu numu nobe-witoo

taya. Yabesoo yise ka tu sake-wi mu tu nakatzimodu-no kuowse onona ka teepu Delmanutha mee naneadu-kwitoo mea'a.

¹¹ Mu Pharisee ka Te Pabe'e-baa petugase oo nesootzemana mee oo netamma, "U sakwa mee tzapoonneku ka Te Naa Pooha-matu u hee-gana." ¹² Soo Te Pabe'e yise mu nasoomenakwana, mee ka mu gi tunaka'oedyukudu netamma, "Mooasoo nu mu tzapoonnekuse sapa, mu gi oo soo'oedyukute. Nu gi mu tzapoonnekukwu, ka e pooha-gana." ¹³ Oosoo yise ka mu tunakatzimodu-no, ka mu Pharisee-baa'yoona mea'ase ka sake-wi tzoonooase ka baa natzemangeka.

¹⁴ Umu oo nakatzimodu ka baa natsemanegase ka tu tukuba soomu'waka. Sumuooosoo tukaba yise tuno'o ka sake-wi. ¹⁵ Soo Te Pabe'e yise meeo mu netamma "Ka mu numu yadooedu namayuadu tukaba gi soogwipana."

¹⁶ Umu oo nakatzimodu yise gi oo nakasopedakwadoona yise meeo nananetamma, "Soo Te Pabe'e te nesootze'ma ka tukaba te soomu'wakuse." ¹⁷⁻¹⁸ Soo Te Pabe'e ka mu nakasopedakwadoose meeo mu netamma, "Gi suiipana ka gi tukuba-gana. Mu gisoo e pooha nakasopedakwato. ¹⁹ Mu ka sumuna oo sooma'yu nu manegeoo tukaba-koobattoo nanesootuhi, oo ewakwuna soogwina. Nu yise ewow numu (5000) maka. Huoo kawona-witu ooka a nagupenina



Ka tukaba noko pakue nanesootuhikuse ka mu numu ewana maka (Mark 8.11)

umu numu tzobahoo?" mee. Sumu'yoo mu oo nakatzimodu yise meeo oo nanekwegea, "Wahamatsebookudu (12) kawona-witu," mee. ²⁰"Nu yise tuwow ewowsoo (4000) numu maka, natakwatsukwuoo (7) tukaba-gana, mu yise ewowsoo tuwazoo hane, ka a nagupenina. Huoo kawona-witu ooka a nagupenina umu numu (5000) tzobahoo?" Sumu'yoo mu oo nakatzimodu yise meeo oo nanekwegea, natakwatsukwuoo (7) kawona-witoo mee. ²¹Soo Te Pabe'e yise meeo unakwe, "Mu gi e nakasopedakwato, mu tuwazoo gi e naka'oedyukute."

²²Umu yise ka Bethsaida-wisoo kodyu petu. Susumudu numu ka Te Pabe'e-matoo gi tubootabuedu tsaka petu. Umu meeo ka Te Pabe'e netamma, "U sakwa eka nana, gi tubootabuedu-ma matuguse a mabesaku." ²³Soo Te Pabe'e yise oo tsakakase oo pooe-witoo tooheoo. Yise o-kooba matuoonase, meeo oo tubenga, "U haa'a tooe besa tubooha'e meno'o?" ²⁴Soo gi tubootabuedu mee oo nanekwegea, "Nu meno'o yaatu poonnepana, ka mu numu-ma sogomeadu, sunngabe-kwa'ne posoobedya." ²⁵Soo Te Pabe'e oo pooe-kooba matuoonasoo, soo gi tubootabuedu besa manise besa tuboohwa'e. ²⁶Soo Te Pabe'e meeo oo netamma, "U sakwa kaaheno nobe-witoo mea, gi numu tuukwepana."

²⁷Soo Te Pabe'e yise mu tunakatzimodu-no ka Galilee-wi'yoona mea'a, ka Caesarea Philippi mee naneadu-kwitoo. Onow po-kumi sogo meana meeo mu tubenga, "Hayoo mu nu-witu naka?" ²⁸Umu oo nekwegea, "Susumudu numu meeo u ka sumuna John baa-wi numu matzakudu. Susumudu numu meeo u ka sumuna Elijah. Susumudu punno'o meeo u ka sumuna Te Naa-witu wahadu." ²⁹Soo Te Pabe'e mu tubenga, "Hayoo mu nu-witu sooyugwe?" Soo Peter oo nekwegea, "U Te Tubetse Pabe'e," mee. ³⁰Soo Te Pabe'e meeo mu netamma, "Gi e wahapana, nu yow Mu Pabe'e."

³¹Soo Te Pabe'e yise meeo mu tunakatzimodu tuukwe, "Mu numu yadooakudu gi e petzape, unu nananuumadu e wumakuse, e batsase, o'no yise pahe tooise saa'a nu tuusootaboedooa." ³²Soo Te Pabe'e toge kaaheno meeo unakwe. Umu oo nakase soo Peter yise ka Te Pabe'e oetu meeo watze tunesoobedyakute, "Gi soo hee oo manepunne. Gi umu u batsa." ³³Soo Te Pabe'e yise mu tunakatzimodu-matoo kodyuse meeo ka Peter netamma, "Gi meeo unnepana. Oosoo Suta'yoo u ne'emukwawunu. U sukwe numu soonamme-kwa'ne tusooyugwe, gi ka Te Naa soonamme-kwa'ne."

³⁴Soo Te Pabe'e yise no'oko mu numu, ka umu tunakatzimodu-nokosoo mee mu netamma, "Tooe haga tooe nu-wi tunaka'oedyukudu sakwa mee unne oosoo gi hownne'yoo, tooe mu ka nu-koobato nabatsase sapa, mu e nagenokwu. ³⁵Tamme ka tammesoo too'e namagwetzoina tamme kadoo'oo namayugwekwu, mu ka nu-koobato kadoo'oo mesoo namayugwena mu namagwetzoikwu. ³⁶Tamme ka teepu-kooba'yoona ewow hee-ga'yoo pana ka te ya'ese oosoo gi te magwetzo-wa'ne'yoo. ³⁷Gi oosoo te gwetzoina tumu-wa'ne'yoo. ³⁸Tooe haga tooe nu-ma nasookwina, noko e unnepu tuwazoo, nu yise punno'o, saa'a mu-ma nasookwikwu, ka Te Naa pooha-toohakwi e petuse, ka togoopadu e tutummatziwabe mu toha kakasa-gakoo-no."

9 ¹Soo Te Pabe'e yise meeo mu netamma, “Nu togesapa mu tuukwepu susumudu mu yaa konnodu gisoo tuina, e pooha-gana poonnekwu.”

²Oona ka sumuna sumu natakwatsu (7) tooise oosoo Te Pabe'e tu pupua'amu bikase, oona ka pa'a giba-ma'yoona nanesootuhi-ga. ³Ka togesoo oo nanesootuhiwunu soo pukwi oo namasooana atasoo tapu'a, besa toha patakwetseaawunu. ⁴O'no yise waha'yoo nanana oo-baa petuoo, Elijah-no Moses mee'e nananeadu umu nanano yise yadoo'a. ⁵Soo Peter yise meeo ka Te Pabe'e netamma, “Besa numme ka kemma'ase. Numme sakwa piho mu tatza nobe-tooku. O'no mu ka Elijah noko Moses-no susu'muoo,” ⁶mee unne, ka gi tu unnena sopedakwadoona ka unu suise. ⁷Togesoo oo yadooawunu soo koomeba umu-kooba habaga petuoo. Te Naa yise ka koomeba-naga'yoona yadooakooa. “Yow esoo nuga Besaa Tooa, mu sakwa besa a nakabetsea.”

⁸Soo Te Pabe'e suu'mu yise umu-baasoo. Mu Elijah-no Moses kadoo'oo.

⁹Soo Te Pabe'e tu nakatzimodu-no ka giba-ma'yoona sawekese meeo mu netamma, “Gisoo haka tuukwepana, ka mu poonnena. Ka kadoo e manese yise e yotsese, o'no suu'mu saa'a mu numu tuukwe.” ¹⁰Mu oo nakatzimodu yise ka Te Pabe'e nakase gi oo waha, pana yise meeo nanatuubenga, “Ha'oo manena meeo unakwe? Te Pabe'e haa'a ya'ese yise pudu yotsekwu?” ¹¹Umu yise ka Te Pabe'e meeo netamma, “Umu Te Naa yadooawabe meeo unakwe, Elijah moe petukoo, o haa'a togesapa numme natuukwe'e? O'no yise haa'a Te Pabe'e mu nakwi saa'a petudooa?” ¹²Soo Te Pabe'e yise meeo mu netamma, “Aha, meeo tubetse nabotugu. Mooe'ugasoo soo Elijah ka mu numu moe tunesootabue petukwu. Nu yise oo-penakwa petuhoose suda punno'o namatugukoo. ¹³Mooasoo soo Elijah moe kemmapu. Umu numu yise tooe how tooe ka Elijah yugwe, ka a nabotugu-kwa'nesoo.”

¹⁴⁻¹⁵Soo Te Pabe'e yise tu pupua'amu-no ka mu tunakatzimodu-baasoo kodyu petu. Mu numu ewana ka Te Pabe'e poonnese besa sokwamase ootamme tatanomanega. Mu nananesootuhidu tuukwewabe, ka Te Pabe'e nakatzimodu-no mooasoo mu nanepetukute oe petuoo. ¹⁶Soo Te Pabe'e yise meeo mu tubenga, “How manena umu nananepetukute?”

¹⁷Sumu'yoo nana ka Te Pabe'e meeo netamma, “Nu e tooa'a u-baa too'e hane petu u kadoo'ookoosoo. Oosoo tsoapayaena gi besa yadoo'a. ¹⁸Tooe hano'yoona tooe, soo tsoapa oo-ma tabu'ana soo e tooa ya'eookayakwe. Nu umu ume nakatzimodu, ooka too'e nematzagakwuni tuungu. Umu gi oo mabu'a.”

¹⁹Soo Te Pabe'e meeo mu netamma, “Mu gi e nakabetse'a, tooe nu wuna'me yaa mu-pa'yoopana mu gi e naka'oedyukute. Ka naatse tzakowke.”

²⁰Soo naatse ka Te Pabe'e poonnese ya'ehooka. ²¹Soo Te Pabe'e meeo, “Haa'no wuna'me soo naatse 'yoo manenumme?” Mee soo oo naa, “Tuha'a manakwanasoo. ²²Susumudu soo tsoapa ka naatse too'e soobatsana goso-witoo oo wunapuyakwe, baa-witoo tuwazoo. U pooha haa'a ne sootuhi-wa'ne'yoo? Ne mesoo tummatza'e haa'a?” ²³Soo Jesus yise oo nanekwegea, “U dea'a mooasoo e pooha-gana sopedakwato. Nuka u toge soobedyase, o'no nu u tummatzikwu.” ²⁴Soo nana

meeoo, “Sagwane nu u naka'oedyukute, pana unusoome e naka'oedyukuna nu sookwa'e.” ²⁵Gisoo mu numu ewana petu, soo Te Pabe'e ka tsoapa kwinga'atoo nematzagakwunise mee oo netamma, “Yaanona mea. Gi kodyupana ka naatse-matoo.” ²⁶Soo naatse paba yadooase, ya'eooka. Mu numu yise me'e, “Ya'ehoo haa'a?” ²⁷Soo Te Pabe'e o mi-makoo oo tzadyota. Soo naatse besa manise yotseoo. Soo Te Pabe'e yise umu tu nakatzimodu-no, ka mu numu-baa'yoona mea'a.

²⁸Ka nobe-kwi mu tzoonoase, umu Te Pabe'e nakatzimodu oo tubenga, “How manena numme gi oo nemabu'a?” ²⁹Soo Te Pabe'e mu nekwegea, “Oosoo yoonne'yoo tsoapayaedu nanesootuhibu-ma nata'yadu.”

³⁰Galilee-too umu watze mease ³¹soo Te Pabe'e yise umu tunakatzimodu tuukwega'ase meeoo mu netamma, “Mu nuka wohonedu nu-ma tzakaduse, e batsase, saa'a nu pahe tabemease tuusootabuedooa.” ³²Umu oo unnepu gi nakasopedakwato, pana umu ooka tu tubengakwuna-ma sua'e.

³³Ka mu tunakatzimodu ka Capernaum-wi petugase, ka nobe-kwi'yoona soo Te Pabe'e mee mu tubenga, “Hekwitu mu nehane mu ka kemmana?” ³⁴Mu Te Pabe'e nakatzimodu yise gi ka Te Pabe'e nanekwegea, ka numu oonakwa besa-kwitu nehanena, “Soo tooe haga umu-nagatu ka mu oonakwa besa'yoona oosoo ka Te Naa-baatoo mooe meakoo.” ³⁵Soo Te Pabe'e yise no'oko mu tunakatzimodu nabatoo bise meeoo mu netamma, “Soo tooe haga tooe numu-kobena soo nadatsungadu, sakwa no'oko numu sumu-nakwi'yoona numu tummatzino.” ³⁶Soo Te Pabe'e yise tuitsekoo tuha'akoo umu-baatoo bise, meeoo mu netamma, ³⁷“Mu ka tuitsekoo tuha'akoo nu-koobatoo besa soobedyana, mu tookwa nuka besa sobedya tuwazoo.”

³⁸Soo John ka Te Pabe'e meeoo netamma, “Ka nana ka tsoapa nematzagakwunidu, numme poonne. Tooe oosoo nana gi numme ume nakatzimodu-matu pana u nanea-ma ka tsoapa nematzagakwuni. Numme yise meeoo oo netamma, ‘U sakwa gi ka Te Pabe'e nanea-ma ka tsoapa nematzagakwunipana,’ ” mee. ³⁹Soo Te Pabe'e meeoo mu netamma, “Mu sakwa uga gi meeoo oo netammapana. Oosoo ka e nanea-ma ka tsoapa nematzagakwunikwuse oosoo tookwa gi e nekwohonekwu. ⁴⁰Oosoo besa e tummatza'e. ⁴¹Tooe haga tooe ka e naka'oedyukuna tooe umu nuka tummatzidu bamagase sapa nu mu sukwe sootuhi meakwu.”

⁴²Soo Te Pabe'e yise ka mu tunakatzimodu meeoo netamma, “Gi besa soo tooe haga tooe ka nuga dooamu ka gi togekoo podo mu tunedyoona. Nu sakwa puu sukwe badya'e, gi yise ka gi togekoo mu Te Naa dooamu tunedyoone.

⁴³⁻⁴⁸Nu sakwa e mi sukwe tseka'a, gi ka suda namanedu mahane. Besa'yoo tooe ka sumuoosoo mi-geana Te Naa-baa petugase, gi waahoo mi-geana, ka niwunu-kwitoo wue. Nu sakwa e kuku sukwe tseka'agwuuni, gi ka gi togekoo podo mea. Besa'yoo tooe ka sumuoosoo kuku-gana ka Te Naa-baa petugase, gi waahoo kuku-gana ka niwunu-kwitoo wue. Nu sakwa tuwow e pooe sukwe tsepata, gi ka gi togekoo poonnena. Besa'yoo tooe ka sumuoosoo poegeana



*Ka tuha'akoo nu-koobatoo besa soobedyana mu
tookwa nuka besa soobedyana (Mark 9.37)*

ka Te Naa-baa petugase, gi waahoo poegeana niwunu-kwitoo wue, owetuoo oosapa nidabedu gi nimakwudu. Mu wo'abe yise oosapa mu tookoo soo'adape.

⁴⁹No'yoona oowetuoo numu oo wumadoo.

⁵⁰Ongabe puu ka tukapu besa makamakute, ka gi onga-gana gi hee besa kamma. Mu sakwa ongabe-kwa'ne'yoo. Mu sakwa besa nanapua'ana, besa sokwamamo.”

10 ¹O'no yise ka tubewa, Judea mee naneadu-kwi'yoona, soo Te Pabe'e ewow numu tunedyooe. Ka hoodu, Jordan mee naneadu baa mangega. ²Ewa'yoo tunesootzema numu, Pharisee mee nananeadu oo-baa petuse, meeoo oo tubenga, “Besa'yoo haa'a soo numu ka nanodukwadoose, yise napoonnekwinina?” ³Soo Te Pabe'e mee mu netamma, “Ha'yoo soo Moses ka moo'asoo te tuukwe?” ⁴Umu mee oo nanekwege'a, “Ka moo'asoo soo Moses mee tubo'o, tamme ka napoonnekwinina sakwa tubope-ma

napoonnekwuni.”⁵ Soo Te Pabe'e yise meeoo mu netamma, “Te Naa gi meeoo te netamma. Pana mu gi Te Naa nakabetseana soo Moses yise ekow mu tuukwe. ⁶O'nosoo, soo Te Naa ka numu pudu manumudoose meeoo, ‘Nu ka nana noko mogo'ne manumudoopu. ⁷Umu yise nanodukwadoose, soo nana tu naanapua'a-baa'yoona nomea. Tu nodukwa-no yise nobe-ga'yoo. ⁸Umu yise sumuooosoo numu-wa'ne'yoo. Gi waahoo numu-wa'ne'yoo.’ ⁹Soo Te Naa mee'e te netamma, ‘Ka nodukwadoose gi napoonnekwunipana.’”

¹⁰Ka nobe-kwi petugase, mu oo nakatzimodu ka a napoonnekwunipuwitu mee ka Te Pabe'e tubenga. ¹¹⁻¹²Soo Te Pabe'e mee mu nanekwegea, “Mu nanodukwa sakwa mesoo napoonnekwunipana, ka kumma'akoosoo nodukwadoose ma'emukwa.”

¹³Mu numu yise tu doodoamu ka Te Pabe'e-baa hane petudyakwe, umu oo nanesootuhiku tuunguna. Mu tunakatzimodu ka mu numu poonnena mu nesagwikute ka oo mu manakwe. ¹⁴Soo Te Pabe'e ka mu poonnena meeoo mu netamma, “Gi mu numu tu dooamu hane petudu tayapana, gi mu nesagwikipana. Nu mu dooake sootuhise, umu yise ka Te Naa-baato meakwu.” ¹⁵Soo Te Pabe'e yise meeoo unakwe, “Nu kaaheno mu tuukwekwu, mu mooe'ugasoo, nanekwahakwu, tutugutsekoo dooake-wa'ne'yookwu gi ma'emukwadu. O'no yise mu ka Te Naa-baa petugakwu.” ¹⁶Soo Te Pabe'e yise mu doodoake tzahedana, mu nanesootuhikuna, mu sootuhise umu-baa'yoona mea.

¹⁷Sumu'yoo nana ka Te Pabe'e-baa tanomane petugase oo-kobena meatzedose ka Te Pabe'e meeoo netamma, “U tubetse besa'yoo nana, ha'oo besa sakwa tuwow nu manese namagwetzoi?” mee. ¹⁸Soo Te Pabe'e yise meeoo oo nanekwegea, “U haa'a mee e netamma, u besa'yoo? Gi haga besa'yoo, Te Naa suu'mu besa'yoo. ¹⁹U oo sopedakwato ka Te Naa tamme tuukwepu; gi numu batsapana, gi numu nowuakupana, gi tuduhapana, gi esayipana numu mane-witu, besa tu naa noko tu pea sooyugwena.” ²⁰Soo nana yise meeoo oo netamma, “Mooasoo nu tuha'yoona meeoo na'unnedu nakabetseakena.” ²¹Soo Te Pabe'e yise, ka ooka besa soobedyana mee oo netamma, “U sakwa no'oko u hemma-ma tumuse, ka u nahemena ka mu tutuha manedu hanekuse, o'no yise u ewow hee-gakwu, ka Te Naa-baa'yoona. O'no u yise nuka nakatzinnummekwu.” ²²Soo nana ka oo nakase suda soonamme ka ewow hee-gana.

²³Ka nana mease, soo Te Pabe'e ka mu tunakatzimodu meeoo tuukwe, “Soo ewow hee-ga'yoo numu unusoo manena namagwetzoikwu.” ²⁴⁻²⁵Mu tunakatzimodu ka Te Pabe'e nakase punno'o meeoo tutubenga, “Hownnekoo soo numu yise mesoo namagwetzoa'e?” Pana soo Te Pabe'e meeoo unakwe, “Soo numu gi puusoo namagwetzoi-wa'ne'yoo. Soo Te Naa suu'mu mu magwetzoikwu.”

²⁶Mu tunakatzimodu mee oo netamma, “Kadoo'oo haga numu magwetzoi-wa'ne tabu'a.” ²⁷Soo Te Pabe'e meeoo mu netamma, “Aha. Te Naa suu'mu numu magwetzoidu.”

²⁸Soo Peter meeoo ka Te Pabe'e netamma, “Mooasoo numme no'oko ne hemma matusookwunikese, nanesootuhi mane.” ²⁹⁻³⁰Soo Te Pabe'e yise

meeoo mu netamma, “Tooe haga tooe tu nobe ma'wukadu, tu nanumu, no'oko hemma tu hee-gana, tu dooamu, tu tubewabe, ka nuka nagen a ewowsoo besa no'obatusoo nasootuhikwu, meno'o manekwana. Mu nasootuhikwuna gi moobegwagakwu. ³¹Umu yaa'a teepu-koobatu meno'o numu moohedu, saa'a ka Te Naa-baa'yoona gi hee manepunnekwu. Umu meno'o gi mamaawa'ne'yoo, yaa'a teepu-kooba manepunnedu ka Te Naa-baa'yoona numu moohedooa.”

³²Soo Jesus yise ka Jerusalem-witoo mea. Mu oo nakatzimodu mu numu-no nakasuipana oo nageka. Soo Te Pabe'e yise ka mu tunakatzimodu suu'mu watze tuukwe. ³³“Jerusalem-wi te petugase, mu numu-kobenatu yadooadu nu-ma tzakadukwu, yise umu wawa'a tibo-matoo e tzakakakwu, yise umu nuka batsa tuungukwu. ³⁴Umu tibo'o yise e kobitoo toohena, e wupagetana, yise e batsakwu. Pahe tabe mease nu yise saa'a tuusootabuedooa.”

³⁵Mu nawanga'a James-no John ka Te Pabe'e-baa petu, yise meeoo oo netamma, “U haa'a sakwa ne tummatzi?” ³⁶Soo Te Pabe'e yise meeoo mu tubenga, “Hownnekoo sakwa nu mu tummatzi? Hemma mu soogwina?” ³⁷Umu meeoo oo nanekwegea, “U ka pudusoo numu-kobena katukwuse, how sakwa numme ka u-baa sapa aatana?” ³⁸Soo Te Pabe'e meeoo mu nanekwegea, “Nu nabatsase, namayodase yise saa'a ka numu-kobena katudooa. Mu haa'a punno'o oosoo?” ³⁹Mu waha'yoo ka Te Pabe'e meeoo netamma, “Numme sakwa punno'o oosoo mesoo mane.” Soo Te Pabe'e mu nanekwegea mee, “Aha. Mu punno'o nu-kwa'nekoosoo wumakwu nu-koobattoo nabatsase, saa'a namayodakwu. ⁴⁰Gi nu ka mu numu-kobena mu aata tuungu-wa'ne'yoo. Mooasoo soo Te Naa oo nemamakwupuna mu oo sopedakwattoo.”

⁴¹No'yoona mu oo nakatzimodu mu nakase, ka James noko John unu sutakute. ⁴²⁻⁴⁵Soo Te Pabe'e yise meeoo mu netamma, “Gi umu wakwawa'amu-kobena katudu-kwa'ne paba nasoooyugwepana. Mu sakwa no'oko numu tummatzimo. Nu ooonne'yoo, ka yaa petuse, nu no'oko ka mu numu tummatza'e. Nu mu numu-koobattoo nabatsakwu, o'no saa'a mu numu gwetzoidooa.”

⁴⁶Soo Te Pabe'e ka pumme nakatzimodu-no ka Jericho mee naneadu-too meakwu. Ewa'yoo mu numu umu-no oo-toogoo me'a. Oosapa po kumabu katudu, soo nana gi tubootabuedu, Bartimaeus mee naneadu, nonotsu mu numu pu-moopaa meadu meeoo netammakayakwe, “E tummatzi.” ⁴⁷Yise oosoo ka Te Pabe'e kemmana nakase, meeoo ka Te Pabe'e netamma, “U sakwa e sootuhi,” mee. ⁴⁸Umu numu ewana oo nesagwikute, “Gi unnepana,” mee oo netamma. Oosoo ka Te Pabe'e pabasoo yadoo, “U sakwa e sootuhi.” ⁴⁹Soo Te Pabe'e yise umu pumme nakatzimodu mee netamma, “Ka gi tubootabuedu, nu-baattoo bike.” Umu tunakatzimodu ka gi tubootabuedu nana mee netamma, “Besa nasoooyugwese, yotse, soo Te Pabe'e yaa meno'o, u ba'e, mee.” ⁵⁰Soo gi tubootabuedu nana yise tu naga'apu mawunise yotseho, yise ka Te Pabe'e-matoo takwue. ⁵¹Soo Te Pabe'e yise meeoo, “Hownnekoo sakwa nu u tummatzi?” Soo gi tubootabuedu meeoo, “Nu gi tubootabuena, enatu e poonnekwuna sookwa'e.” Soo Te Pabe'e yise mee oo netamma, ⁵²“Unudea, u

ka e togesobedyase suu'mu, besa manekwu.” Oosoo gi tubootabuedu nana yise yaatu besa poonne manese, ka podo ka Te Pabe'e tuyohoka.

11 ¹ Soo Te Pabe'e ka umu pumme nakatzimodu-no ka Jerusalem mee naneadu-kwitoo meana, ka Bethphage, noko Bethany mee nananeadu naamootoo mease, ka giba Olive mee naneadu tzage'e petuga. O'no soo Te Pabe'e waahoo umu pumme nakatzimodu-matu ² meeoo netamma, “Ka Bethpage-witoo memeakwate. Onoko mu sumuoo tzagaze natzakunadu mayukwu, gisoo pukooba nakatudu. Oo tzadopase punowsoo saa'a oo wetzakake.” ³ Ka mu numu mumme tubenga, “How mu manakwe?” mee saa'a mu nekwegea, “Soo Te Pabe'e yabesoo a soogwina saa'a yise punowsoo a makodyukudooa.” ⁴ Umu ka memease, ka tzagaze, ka nobe-kobena oo natzaku oo mayu petugase, oo tzadoopahoo. ⁵ Mu numu o konnodu mee mu tubenga, “How yise manena mu a tzadoopa?” ⁶ Umu ka Te Pabe'e unnena mu tuukwese, umu yise, “Muusoo too'e,” mee mu netamma. ⁷ Mu waha'yoo naana yise ka tzagaze ka Te Pabe'e-baatoosozakakase, wega oo-kooba hanese, soo Te Pabe'e ka mu wega-kooba katuno'o. ⁸ Ewa'yoo numu tu wega ka po-kooba wupatzeta, susumudu numu punno'o sunngabe ma'na hanese, yise ka Te Pabe'e ooka podokute. ⁹ Ewa'yoo numu oo kumi meana ka Te Pabe'e nesootuhino'o, besa sokwamana, papaba apegeana, “U yow, U Ne Tubetse Pabe'e, no'oko numu magwetzoidu. ¹⁰ U numme-kooba katudu ka ne namooatupu David-wa'ne'yoo, numme besa sokwama soo Te Naa ka numme-matoo u tayase, soo Te Naa u tubetse sootuhikwu. Soo Te Naa saa'a puusoo te magwetzoidu.” ¹¹ Soo Te Pabe'e Jerusalem-wi petugase, ka nanesootuhi nobe-kwitoo meahoo, no'oko hemma oetu besa sootse'ma, pana ka mooasoo unu yongona oo mane-gapu umu tunakatzimodu-no Bethany-witoo mea'a.

¹²⁻¹³ Ka ookow moooa'awamooa, soo Te Pabe'e ka umu tunakatzimodu-no Bethany-wi'yoona mea'a. Oosoo ka meana, ka sunngabe Fig mee naneadu poonnese, oo-matoo mea, ka tzuaya'ena. Ka tamano, ka sunngabe poee naa-kwi oo manepetuse, gisoo oo pooetoo'a oo mayu petu. Unu sunngabe naka-ga'yoo suu'mu. ¹⁴ Soo Te Pabe'e yise ka sunngabe meeoo netamma, “Gi gea hannano'o u pooetooa-wa'ne'yoo.” Umu oo nakatzimodu oo naka.

¹⁵ Umu Te Pabe'e ka pumme nakatzimodu-no ka Jerusalem-witoo mea'a, yise ka pabow nananesootuhi nobe tzage'e kodyu petuga. Mu weehoo-ma tumudu poonne. Tu hemma tsanabedona, tu seepu-ma tumugonno tuwazoo. Soo Te Pabe'e yise ka hemma pukooba mu tuoonana manapow, oo kadunoo tuwazoo, yise oekoo mu numu matzayubow. ¹⁶ Soo Te Pabe'e meeoo mu netamma, “Mu ka nobe'ana gi ma-toogoo meapana. Esoo pukwi'yoona tu nananesootuhina.” ¹⁷ Soo Te Pabe'e yise mee mu netamma, “O'nosoo soo Te Naa unnepu mee na'unakwe,

‘E nobe pukwi'yoona no'obatusoo numu nanesootuhina.’

Meno'o mu yise nanatuduha mi'yoona.” ¹⁸ Soo numu pabe'e, ka mu numu-koobatoos yadooadu-no ka Te Pabe'e manena sopedakwatoose, oo-ma nakasua'e ka Te Pabe'e meeoo unakwe, yise oo nebatsa, ka ewow

numu ooka nakatoge'yookute. ¹⁹Ka yongo-nakwa, soo Te Pabe'e umu pumme nakatzimodu-no punowsoo kodyuka, ka Bethany-wi tooibodona.

²⁰Tu pudu taba tseboogena, soo Te Pabe'e ka mu tunakatzimodu-no Jerusalem-witoo mea'a. Ka sunngabe moosoo pasapu oo poonne. ²¹Soo Peter ka Te Pabe'e unnena soomayuna mee oo netamma, "U ka etze'e ka sunngabe pasa tuungu, oosoo yise meno'o pasapu," mee'e. ²²⁻²⁴Soo Te Pabe'e yise meeoo mu netamma, "Aha. Mu ekow sooma'yu. Mu sakwa ka Te Naa naka'oedyukuse nanesootuhi. U ka tunaka'oedyukuna, u ka giba ka banunadu-naamookwitoo nooyooa tuunguse, oosoo oo-toogoo manikwu. ²⁵⁻²⁶Ka nanesootuhi manese, mu sakwa ka mumme suda tumatugukudu soomu'wase. O'no Te Naa yise punno'o ka suda mu tumatuguna soomu'wakwu."

²⁷Ka Jerusalem-witooosoo kodyuse soo Te Pabe'e ka mu tunakatzimodu-no, ka nanesootuhi nobe-kobenakwi soo Te Pabe'e nanapedo meowbodote. Mu Jew numu tutunehanedu ka Te Pabe'e-baa petuse ²⁸mee oo tubenga, "Haga pooha tunetamma-toohakwi u yoo manakwe?" ²⁹Soo Te Pabe'e mu nanekwegea, "Nu ka John-witu mu mooe tuukwekwu. Mu ka kaaheno e nanekwegease o'no yise saa'a nu punno'o haga pooha-toohakwi 'yoo nu e manena mu tuukwekwu. ³⁰Haga ka John meeoo netammana oosoo numu baa-wi matzaka, soo Te Naa God, pute oosoo puusoo oo sukwe manakwe?" ³¹Mu tutunehanedu yise puusoo nanano apegeagonnose, mee unakwe, "Tamme ka mee'e unnese soo Te Naa God ka John meeoo netamma, soo Te Pabe'e meeoo te tubengakwu, 'How yise manena mu ka John gi nakabetsea?' ³²Pana, 'Soo John puusoo oo manakwe,' mee te unnese mu numu punno'o te kusekakwu, soo John Te Naa nayadooawabe mee oo netammana, oo naka'oedyukuna." ³³Umu yise mee ka Te Pabe'e nanekwegea, "Numme gi oo sopedakwatoo." Soo Te Pabe'e yise mee mu netamma, "Nu punno'o gi mu tuukwe-wa'ne'yoo ka haga pooha-toohakwi, e pooha ma'na'wena."

12 ¹Soo Te Pabe'e ka mu numu-koobatoosoo yadooadu mee natugwenga, "Sumu'yoo nana puu tumasu'a. Soo nana tumasuase, oo na'oonnakwi koodua-doose, ka tu tumasuana toogoo tuubane nobe-too. Ekow nobe-kwikoo hoobadookwuse. Oosoo tuwazoo tueya'e nobe-toose, ka tumasuape-matu mu numu tuukwena ka tubewabe mu mabetseakwu-kwitoo, yise kwinga'a mea. ²Ka tu nayasa-wi oo manepetuse, oosoo sumuoo numu ka tabewabe-witoo taya, pumme naamookwitoo oo tupooegea tuunguna. ³Umu ka nana-ma tzakaduse oo moedyakwehoo, yise oo taya, gi oo pooe makana. ⁴Soo tumasuadu yise punowsoo kumma'akoosoo pumme tummatzidu taya, umu numu yise suda manakwe, oo kwo-makoo oo wupageta gi hemma oo hanekute. ⁵O'no yise soo tumasuadu ka kumma'akoosoo pumme tummatzidu taya tuwazoo. Umu yise oo patsow. Soo tumasuadu yise ewowsoo pumme

tutummatzidu oetoo tayayakwe. Susumudu mu tutummatzidu oetoo natayadu nuupagetayakwe yise umu-matu punno'o nago'e. ⁶Nakwitoo ka tu besaa tooa tu nabenina umu-matoo taya mee tusooyugwena, 'Umu ka e besaa tooa naka'oedyukuna gi how a yugwe-wa'ne'yoo.' ⁷Pana mu numu meeoo nananetamma, 'Esoo ka tumasuadu besaa tooa. Tamme ka a batsowse, ka oo teepu manikwu.' ⁸Umu yise oo-ma tzakaduse oo batsase ka tumasuape-kwitoo oo wuwazuhoo." ⁹Soo Te Pabe'e yise meeoo mu netamma, "Mu oo sopedakwato, soo tumasuadu sutakwu ka kodyu petuse, ka umu pumme tutummatzidu nagoese. O'no yise oosoo ka tabewabe kumma'akoosoo numu hane tuungukwu." ¹⁰⁻¹¹Soo Te Pabe'e yise mee mu netamma, "Mu sakwa oo sopedakwadoo, ka o'nosoo Te Naa yadooawabe mee nu-witu botugu,

'Mu tupe nobe-tootu tumoodyipu tupe tookwa besa'yoo tupe, ka penakwa mu nobe namadabue-kwi oosoo tupe unu nadatzenga petu. Soo Te Naa yoo tumadabue, tamme yise tubetse besa sokwama ma-koobato.' "

¹²Mu numu-koobato yadooadu ka Te Pabe'e too'e nekwutuma, ka pukwitu oo sopedakwatoose, umu ka mu numu-ma su'ina, sukwe me'a.

¹³Mu numu-koobato yadooadu-matu Pharisee, mu wakwawa'a numu pabe'e pupua'amu-no, ka Te Pabe'e-matoo nataya. Yow umuoo numu ka Te Pabe'e unu nesoonaahadyakwedu. ¹⁴Umu ka Te Pabe'e meeoo netamma, "U tubetse besa'yooona, ka umu numu Te Naa-witu besa tunedyoo'e. U gi numu tutzeadu; yise gi tuwazoo u numu nesootzemadu. How haa'a sakwa tamme, ka mu wakwawa'a numu pabe'e tumanagaku?" ¹⁵Soo Jesus mu sopedakwato ka pumme mu nesoonaahadyakwe yise meeoo mu netamma, "Gi sakwa mu e nesoonaahadyakwepana, ka mu tumanagapumatu e tzapoonneku." ¹⁶Umu yise oo tzapoonnese soo Te Pabe'e yise meeoo mu netamma, "Haga mama namanaka, yise haga naneana mama nabo'o?" mee. Umu mee oo netamma, "Soo mu wakwawa'a pabe'e mama." ¹⁷Soo Te Pabe'e yise meeoo mu netamma, "Tamme sakwa mu wakwawa'a numu pabe'e gea, esoo umuoo nanumu tumadabuena. Tamme sakwa ka Te Naa tumadabuena, ka Te Naasoo gea." Mu numu besa o sukwe poo'nepebu'ahoo.

¹⁸Mu sumubaatu nanesootuhidu numu, Sadducee mee nananeadu, ka Te Pabe'e-baa petuga. Umu Sadducee meeoo nananesootuhidu, soo numu ka ya'ese sumu tammesoo me'adu. ¹⁹Umu meeoo ka Te Pabe'e tuukwe, "O'nosoo ka Moses tunetammapu umu mayohodu, ka tu pabe'e gi dooamu-gakoo kadoo'oo oo manese, soo penakwatu oo wannga'a sakwa oo nodukwadoose, tu pabe'e dooamudooku. ²⁰Natakwatsukwe'yoo (7) mu nanakwanga'amu. Oosoo mu tubetse pabe'e ka ekow mogo'ne mooe nodukwa-ga'yoo. Ka tu mooe kooma kadoo manese, gi oo-makoo dooamu-ga'yoo. ²¹Ka oo pabe'e ya'ese, oo wannga'a koomadoo. Ooka tuwazoo ya'ese, gisoo tuwow oo-makoo dooamu-ga'yoo. ²²Umuoo

natakwatsukwuoo (7) naana esoo mogo'ne nanasusu'mu mu koomadookese, gisoo umu-makoo dooamu-gana yise punno'o kadoo 'mane. ²³Esoo mogo'ne yise ka saa'a namayodase haga kooma-gakwu? Mu no'yoona natakwatsukwu'yoo (7) nanakwannga'amu oo nodukwa-gakena," mee'e umu oo nesootzemaana unakwe. ²⁴Soo Te Pabe'e meeoo mu Sadducee netamma, "Mu gi o nakasopedakwatoo ka Te Naa tubetse tunetammapu, tamme oo pooha netammapu. ²⁵Mu sakwa yise ka saa'a namayodase mu toha kakasa-gakoo Te Naa tummatzidu-kwa'ne, mu gi mu nodukwa-gana soohanekwu. ²⁶Mu ka oo naka'oedyukuna tooe mu tuiise sapa. Mu saa'a gi moobegwaga gwetzoimokwu ka Te Naa-baa petugase. Te Naa tamme tunetammakuna. Moses ka poewunudu niwunu oo-kobena wunu, soo Te Naa yise ka Moses meeoo netamma, 'Mu Abraham, mu Isaac, mu Jacob puu tooesoo nu-matoo nanesootuha'e. Nu yise mu Nanesootuhi Naa.' " ²⁷Soo Te Pabe'e yise meeoo mu netamma, "Te Naa gi mu tuipu Naa, mu togesoo modu suu'mu. Mu ka Te Naa nanetsagwayipana, mu tubetse gi oo naka'oedyukute."

²⁸Oosoo sumu'yoo nana mu tunedyooedu-matu, oona oo nakakwunu. Ka Te Pabe'e no'osoo pumme mu numu tubenga, besa mu nanekwege'a mee oo nakasoobedya, soo nana ka Te Pabe'e yise meeoo tubenga, "Hanotu umu-matu ka Te Naa unnepu oonnakwa besa'yoo umu te tumayohope-matu?" ²⁹Soo Te Pabe'e yise meeoo oo netamma, "Waha-baatu esoo na'unnepu Te Naa tamme tuukwepu besa'yoo. Mooe'ugasoo, 'Soo Te Naa Te Manumudoopu. ³⁰Tamme sakwa tubetse besa oo soobedya. ³¹Soo penakwatu yise meeoo.

"Tamme sakwa mu numu besa soobedya tammesoo nasooobedya-kwa'ne.' "

³²Soo nana meeoo oo netamma, "Besa'yoo soo nayadooape. Oosoo sumu'yooosoo, Te Naa Te Manumudoopu. O oosoo Te Naa. ³³Tamme punno'o sakwa ka Te Naa besa soobedya. Soo penakwatu yise, tamme sakwa tammesoo besa nanasoobedya, tuwazoo. Umu waha'yoo no'okosoo nanesootuhipu oonnakwa besa'yoo."

³⁴Soo Te Pabe'e yise mee oo netamma, "U unu soonammedu. U tookwa unu oo naka'oedyukukwu." Umu numu yise naka nasookwise gi hemma ka Te Pabe'e tubenga mani.

³⁵Soo Te Pabe'e yise ka pabow nanesootuhi nobe-kobena petu, umu ewa'yoo numu o manepunne. Soo Te Pabe'e yise meeoo mu numu netamma, "Umu ka Te Pabe'e tuukwewabe David-matu mee oo netamma. ³⁶Pana soo David ka Te Naa pooha-toohakwi Te Pabe'e mee oo natuba'nga. Ka David tubotugu-kwi meeoo, 'Soo Te Naa ka Te Pabe'e mee netammapu, "U sakwa oosapa e tumadinakwu katu ka umu ume wohonedu e matzooekuno'otoo.' "

³⁷How yise soo David Te Pabe'e mee oo natuba'nga ka punakwana oo nanekemma sapa?" mee'e soo Te Pabe'e mu tubenga.

³⁸"Ka mu meeoo tuukwedu gi naka'oedyukupana, umu tu nanesookwugina sukwe soogwidu. Umu numu tunedyooedu unu besow namasoo'a. ³⁹Ka paba tu na'ewa tukano'o, umu besa-kwi tu katuna soogwa'e.

Ka nanesootuhi nobe-kwi'yoona, tuwazoo unu besa-kwi tu katuna soogwa'e. ⁴⁰Umu yise ka mu pepeawabe hemma tuduhana mu nanesootuhikute. Umu sugwe'apa wuna'me mu nanesootuhikute. Umu gi besa numu tunedyooedu. Umu unu suda manedu tumatuguna, umu-matoosoo kodyukwu.”

⁴¹Soo Te Pabe'e mu owenapa mu poonne katu, ka mu numu ewana ka tumasumudoope-kwi tutuonadyakwe. Susumudu mu naana ewow hee-ga'yoo ewa oe tutuoo'na. ⁴²Sumu'yoo mogo'ne tu kooma kadoo'oo manekupu umu-tamme kemma. Gi hemma mapu'a, oosoo yise huutse oe tutuoo'na. ⁴³Soo Te Pabe'e yise mee mu tunakatzimodu netamma, “Yaa esoo mogo'ne. Esoo tu penebetu oe tuonahoo. ⁴⁴Yise mu naana gi ewa oe tutuoo'na ka a namasumutoo-kwi, tooe ewa oo hee-gapana. Esoo mogo'ne tu penebetu oe tuonahoo. Gi haa'nokoo oe tuona, pana a besana puma mu gwetzoina mee nu.”

13 ¹Ka nanesootuhi nobe-kwi'yoona, sumu'yoo mu tunakatzimodu-matu ka Te Pabe'e meeoo netamma, “Esoo nanesootuhi nobe tupe noko namadabuepu-ga'yoo. Mu yaatu tupe papaba'yoo. Esoo nanesootuhi nobe besa tabu'a.”

²Soo Te Pabe'e meeoo oo netamma, “Esoo nobe besa'yoo pana te wokwohomu no'oko a wuyoomedakwunikwu.”

³Umu yise ka tuutsekoo giba-ma, Olive mee naneadu-kwitoo mease o aata'a, ka nanesootuhi nobe poonne. Peter, James, John, Andrew yise mee oo watse tubenga. ⁴“How sakwa tamme oo sopedakwatoosoo tabua, ka nobe nuudyoomedakwuna? Hee te tzapoonnekukwu hannano'o oo manikwuna?”

⁵⁻⁶Soo Te Pabe'e meeoo mu nanekwege'a, “Ewa'yoo numu meeoo naneyugwedu, yow numme Te Pabe'e. Nu gi mu esayaedu-matu, meeoo soo esayaedu mu tuukwekwu. Ewa'yoo mu numu nanemooagakwu. Gi mu naka'oedyukupana. ⁷Tooe hanotu tooe mu numu mesoo nanago'e. Gi saa'a su'lipana. Gi soo te teepu suda mane-wa'ne'yoo, gi meeoo hemma sooyugwepana.

⁸Mu numu yise nanano ewa nanagoekwu. Tooe hanotu tooe saa'a, soo te teepu yutsungadooda. Mu numu saa'a tseagoedooda. Gi besow saa'a hemma mu poonnedooda.”

⁹Soo Te Pabe'e yise mee mu netamma, “Mu sakwa namasootzema. Mu sumuna nahemase, mu nanehanedooda. Mu saa'a nuupagetadooda. Mu gi e naka'oedyukudu saa'a gi mu petzabedooda. Mu yise nuga besa unnepu mu tuukwedooda.

¹⁰No'obatusoo mu numu saa'a e unnepu nakadooda. ¹¹Mu ka nakwutumase, gi suda oo soonamekupana ka hayoo mu unnekwuna. Soo Te Naa Besa Pooaha ooka mada'e. ¹²⁻¹³Ewa'yoo mu numu gi e petzabedooda, mu nananumudooe suda mu matugudooda, yise mu goedooda saa'a. Ka umu gi e soo'oedyukudu, gi mumme numu petzabedu, gi e naka'oedyukudu, gi e ma'wukadu, nu magwetzoikwu.

¹⁴Tooe hemma tooe suta'yoo^d ka nanesootuhi nobe-kobena natzekwunukukwu. O'no sakwa mu ka oo poonnese, Judea-wi'yoona yabesoo mea'a. ¹⁵Oosoo tu

d 13:14 Tamme sakwa oo sopedakwatoosoo ka hemma sutahoo ka Te Pabe'e tuukwe-kwitu.

nobe-kobena wununnummedu sakwa gi tu nobe-kwitu hemma gwuupana, yabesoo meeow. ¹⁶Soo tubewabe-kwitu hemma how yugwewunudu sakwa punno'o gi hemma gwuupana, gi tu nobe-kwitoo kodyupana, yabesoo meeow. ¹⁷Ka yabesoo mea'akwuse, mu koheadu-kwi gi besa, ka mu sutuba mea'akwuse mu oonga'a petzekudu punno'o. ¹⁸Umu sakwa nanesootuhi gi sakwa tommo hee oo suda manepana. ¹⁹Esoo gi besa a namanekwuna tubetse unu suda, gi hannano'o namanedu ka teepu namadabuese. ²⁰Te Naa yise ka umu tu tutzeanana sootuhikwu, ka gi oo tzadyoo'ikuna gi haga namagwetz'o'i-wa'ne'yoo.

²¹Tooe haga tooe sumuna meeoo mu tuukwekwu, 'Soo Te Pabe'e mooasoo kodyu petu.' Gi oo naka oedyukupana. ²²Ewa tuwazoo na'esagoekwu, 'Nu Yow Mu Pabe'e mee na'unnekwu.' Ewasoo mu numu moohedu numu nemooagayakwe. Nanasookwugi hemma mu tzapoonnekukwu, tooe hemma tooe pooha mahanekwu, ka umu e dooamu too'e nemooagana. ²³Mooasoo nu mu tuukwepu. Ooonne'yoona sakwa mu namasootzemapunne.

²⁴O'no ka gi hemma besa manekwuse, soo taba toganohookwu, soo muha punno'o. ²⁵Mu paatoozooba punno'o sawedyikwu. ²⁶No'yoona mu numu punno'o ka koomeba-nagakoo e pooha kodyu petukwuna poonnekwu. ²⁷Umu toha kakasa-ga'yoo e tutummatzikkwutu, tooe hanotu tooe ka yaa teepu-kooba'yoona, mu e nanumu nu-baa hanepetukwu.

²⁸Ka sunngabe poeedoase, mu meeoo sokwamadooa, tamme tookwa tamatsebooe. ²⁹Ka gi besa hemma manekese, mu yise oo sopedakwadookwu, nu tookwa pudusoo kodyu petukwu. ³⁰Susumudu mu numu-matu ka hemma oo manedu poonnekwu gisoo ya'ena. ³¹Nuga unnepu besa na'unnedu, gi atasoo naneyugwe-wa'ne'yoo.

³²Ka hannano'o oe e petuookwuna manepetuse, gi haga ka teepu-koobatu oo sopedakwato. Mu toogoopatu Te Naa tutummatzidu puu gi, nu punno'o gi. Te Naa suu'mu oo sopedakwadoopunne ka hannano'o e petuookwuna. ³³Mu sakwa oosapa namasootzemapunne.

³⁴Nu-kwa'nesoo, sumu'yoo numu puu ka meakwuse, ka hemma how pumme yugwekudu hemma nemanekuga. Ka tu'eyaedu meeoo netamma, 'Gi u'wepana.' ³⁵⁻³⁷Mu sakwa nonotsu tabeno nuummabetsabena. Tooe hannano'o tooe nu kemmowgena, yongona, togano, awamooasoo. Nu sumuna gi mu nuummabetsape mu mayu petukwu."

14 ¹Mooa yongona oetu, o'nosoo te manena te natzama'wukwuna soomayuna, yise ewa tukakwu, ka Gi Namayuadu Tukaba tukakwu. Soo Jew numu tutunehanedu ka Te Pabe'e watze nesootze'ma mee yise, "How sakwa tamme ka Jesus watze tzakadu tabuase, oo batsa? ²Tamme sakwa gi numu poonnena oo batsapana, mu numu tamme-no nagoedooa."

³Soo Te Pabe'e ka Bethany-wi ka Simon Tookoo Pehe mee naneadu nobe-kwi. Mu tukawunu, sumu'yoo mogo'ne oe petuoo. Ka tupe osa-witu ka besa kwanadu nakwana'a gwuuna. Ka osa tsabadowse, ka Te Pabe'e kwo-kooba oo tuoonahoo. ⁴⁻⁵Susumudu mu Te Pabe'e-batu ka mogo'ne manena nesootu'adya'e,

“Oosoo sakwa gi oo nahadyagwepana ka besa kwanadu nakwana'a oosoo ewa nanenagadu. Oosoo sakwa oo-ma tumuse mu tutuha manedu namadea.”

⁶ Soo Te Pabe'e yise meeoo mu netamma, “A tsasoopedya. Gi a nesootu'adya'e pana. Esoo mogo'ne besa manakwe. ⁷ Mu tutuha manedu toee hannano'o pana oosapa mu-no'yookwu, pana nu gi oosapa mu-no'yookwu. ⁸ Soo mogo'ne manena dea'a, e natugukwu-kwitoo a natumayohona. ⁹ Toee hano toee ka teepu kaa'no, ka besa nayadooadu-kwi esoo mogo'ne manepu saa'a nanatugwengadoo. Oo-makoo tamme nanasoomayudooa.”

¹⁰ Sumu'yoo mu Te Pabe'e nakatzimodu-matu Judas Iscariot mee naneadu ka mu Jew numu tutunehanedu-baa petuse mee mu netamma, “Nu oo sopedakwatoe ka Ne Pabe'e pukwi'yoona nu sumuna mu tuukwekwu.” ¹¹ Mu tutunehanedu besa sokwama ka oo nakase umu yise ka Judas tumasumudooku. Soo Judas yise meeoo soonamme, “Hownnekoo sakwa nu ka Te Pabe'e-matoo mu bika?”

¹² Yaa tabeno numme ka seepu tooa'a batsakwu, ka gi namayuadu tukaba noko oo ewa tukakwuse mu oo nakatzimodu yise ka Te Pabe'e tubenga, “Hano'yoona sakwa tamme ewa tuka?” ¹³ Soo Te Pabe'e yise waahoo mu tunakatzimodu-matu tayase. Mee mu netamma, “Ka nana baa tzanodu mu saa'a wegeadoo. ¹⁴ Mu saa'a ookow nageakadoo. Ka nobe-kwi oo egeakase oo-nosoo saa'a tzoonoohookwatase ka nana nobe-gakoo mee netamma, ‘Soo Te Pabe'e umu pumme nakatzimodu-no yaa u-baa'yoona nanesootuhi yongo tukakwu.’ ¹⁵ Esoo nana nobe-ga'yoo yise mu tzapoonnekukwu, ka pa'atu nobe-kwi'yoona ka tukapu mu yonga tukakwuna mu saadoo.” ¹⁶ Mu waha'yoo yise memea, ka Te Pabe'e unne-toosoo manekwuse.

¹⁷ Ka tu yongose Te Pabe'e umu tunakatzimodu-no ka nobe-kwi petuga. ¹⁸ Umu-no tukanasoo, Te Pabe'e mee unakwe, “Sumu'yoo mu-matu nu-no tukadu ka mu tukwutumadu nu-matoo bikekwu, umu yise e batsakwu.”

¹⁹ Mu Te Pabe'e nakatzimodu oo nakase, suda nuummana, umu nanasusu'mu'yoona mee unakwe, “Nu haa'a?” ²⁰ Soo Te Pabe'e mu nekwegea, “Sumu'yoo mu-nagatu nu-no tukadu. ²¹ Too'e soo Te Naa mooasoo, ‘U nabatsakwu,’ mee tunetammapana, saa'a oosoo umu e wohomu nu-matoo bikepu tuma'emukwana oo-matoosoo kodyukwu.”

²² Mu tuka, soo Te Pabe'e tukaba gwuuhoose, oo-koobattoo nanesootuhise oo tزابoka. Yise umu tunakatzimodu hemese ooka mu tuka tuungu, mee unnena, “Esoo puu nuga tookoo-wa'ne'yoosoo.” ²³ Yise ka besow atsa baa yoongase oo-koobattoo nanesootuhise, ooka mu hebe tuungu. ²⁴ Soo Te Pabe'e mee'e unnena, “Esoo puu nuga puupe-wa'ne'yoosoo. Te Naa Toogooapatu besa unnena tunetammana, suda mu manepu-koobattoo e nabatsakwuse. ²⁵ Nu mu tuukwe'e nu ekow atsa baa ka yaa teepu-koobatu tubetse gi hebekwusoo, saa'a ka Te Naa ka te teepu mapudutupudoose, o'no yise nu tubetse pudutupusoo hebekwu.”

²⁶ Umu yise nanesootuhi hoobea nekwuna ka Olive mee naneadu tuutsekoogiba-matoo mea'a. ²⁷ Soo Te Pabe'e yise mee ne netamma, “Ka yaa togano

suda tu namanikwuse mu e ma'wuookakwu. O'nosoo soo Te Naa yadooawabe mee'e tubotugupu, mee'e na'unakwe ka meno'o Te Pabe'e manekwuna.

'Soo seepu takonedu nabatsahookwu, mu seepu yise nana'emota petugwahookwu.'

²⁸ Nu saa'a e ya'ekwukoo namayodase, Galilee-witoo mu-kobenasoo meadoo. Mu saa'a, o nu-baa petugadoo.

²⁹ Soo Peter meeoo ka Te Pabe'e netamma, "Mu u nakatzimodu sumuna u-kooba'yoonna mea'akwu, nu gi umu-no meakwu."

³⁰ Soo Te Pabe'e meeoo ka Peter netamma, "Togesoo tu toganopunne, ka tsekana kwu'a gisoo wahadooee oo yaka, u pahadooee oona numu tuukwekwu u gi e sopedakwatooo mee."

³¹ Soo Peter yise meeoo Te Pabe'e netamma, "Tooe umu e batsakwu mee unnepana nu gi meeoo unne-wa'ne'yoo, ka gi u-ma nasookwina." Mu Te Pabe'e nakatzimodu no'yoonna oo-wa'nesoo unakwe.

³² Ka Olive namasu'a-wi petuse, Gethsemane mee naneadu, soo Te Pabe'e mu tunakatzimodu mee netamma, "Yowsoo aatapunne. Nu nanesootuhigakwu."

³³ Mu Peter, James, John oo-no mea'a. ³⁴ Soo Te Pabe'e mee mu netamma, "E pewu-kwitu tubetse suda nuumma. Mu sakwa yaahoosoo aatapunne." ³⁵ Soo Te Pabe'e sagwane umu kwinga'atoosoo meahoosoo, o ka teepu-kooba meatzedose, yise nanesootuhikooha. ³⁶ "E Naa Toogoopatu. Nuga Naa Toogoopatu. Nuka u tunetammakuse nu oo-toogoo meakwu. Ekow e pewu-kwitu suda nuummana, kadoo'oo mayugwe." Soo Te Pabe'e ka nanesootuhimakwuse ³⁷ tu pupua'amu utua'e mu mayu petuga. Soo Te Pabe'e mee mu netamma, "How mu tubetse unu utuigapu-ga'yoo?" Soo Te Pabe'e ka Peter meeoo netamma, "U sakwa gi uwepana." ³⁸ No'oko yise meeoo netamma, "Mu sakwa nanesootuhi aata o'no soo suta'yoo gi mu matzama. Mu gi oo mapu'a ka gi manese mee'e nu."

³⁹ Soo Te Pabe'e yise penakwa nanesootuhigase ka mooe'ugasoo tu nanesootuhi-kwa'nekoosoo nanesootuhi. ⁴⁰ Yise tu pupua'amu-baa kodyu petuse, mu utua'e mu mayu petusoo. ⁴¹⁻⁴² Yise nanesootuhigasoo tuwazoo saa'a umu-baasoo kodyu petu, tooesoo mu utua'e. Soo Te Pabe'e yise meeoo mu netamma, "Yow haa'a mu togesoo utua'e? Yosuhoo, tamme mea'akwu, meno'o oe mani petu, nu natzakwenekwu. Yaa soo suta'yoo nana kemma."

⁴³⁻⁴⁵ Ka Te Pabe'e togesoo yadoo'a, Judas petuoo, mu Jew numu tutunehanedu mu tukwutumadu taya ka Judas noko. Pabatze'ekoo koodoo'oo noko tsegesa hemana. Soo Judas, ka Te Pabe'e-matoo tooe. Soo Judas yise oo-no namitzadya'me o'no umu oo sopedakwatooo. ⁴⁶ Umu yise ka Te Pabe'e-ma tsakatu.

⁴⁷ Sumu'yoo umu Te Pabe'e nakatzimodu-matu yise tsegesa-ma ka mu Jew numu tunehanedu pabe'e tummatzidu naka wuga'akwunihoo. ⁴⁸ Soo Te Pabe'e yise ka mu tukwutumadu meeoo netamma, "Nu gi suda tumatugudu, gi nu naduyadu, gi tuduhadu tuwazoo. Gi sakwa mu koodoo'oo-ma e tumahepana, tsegesa-ma tuwazoo. ⁴⁹ Tooe ka e nanesootuhi nobe-kwikoo sapa, mu gi nu-ma tzakadupu-ga'yoo. Muusoo too'e. Mooasoo soo tubepe

ebeoo nabotuku, o'nosoo Te Naa tamme tuukwe-kwa'nesoo.”⁵⁰ Mu Te Pabe'e nakatzimodu oo-ma su'ise, ka Te Pabe'e-baa'yoona namabetugwahoo.⁵¹ Nu ka toobetsena, ka Te Pabe'e nagwuuhoose, naga'apu-wi wunaga'a yaahoose ka Te Pabe'e-nakwi meano'o.⁵² Umu tukwutumadu e naga'apu-ma tsakatu, nu yise e naga'apu makwumahoose namameow.

⁵³ Umu yise ka Te Pabe'e na'enakwakoo oo puta-ma tzakaduse, ka Jew numu pabe'e-matu oo tsakaka. Umu tutunehanedu oo nehanekwu.⁵⁴ Soo Peter kwinga'a mu nakwi me'a, ka Jew numu pabe'e nobe-kobena petugase, o yoekatu.⁵⁵ Soo Jew numu pabe'e ka mu tutunehanedu-no ka Te Pabe'e too'e batsakwuse, gi toge oo manena too'e nemayupana gi hemma nemama'yu.⁵⁶⁻⁵⁷ Susumudu nanana oo manena too'e wahana sukwe esago'e. Umu too'e tuukwepana kadoo'oo hee, tubetse gi hemma nemama'yu.⁵⁸ “Numme meeoo oo unakwe oo naka, ‘Nu ka nobe, ka Te Naa-matoo pukwi'yoona te nanesootuhina kadoo'oo mesoo mayugwe, yise pahe tabeba-wi oo mesoo mayota.’”⁵⁹ Mu naana gi nanakwa'nesoo unakwe.

⁶⁰ Soo Jew numu pabe'e umu-kobena'yoona ka Te Pabe'e tubenga, “Togesapa haa'a umu nanana meeoo u netamma?”⁶¹ Soo Te Pabe'e tubetse gi hiyoo unakwe. Soo Jew numu pabe'e yise mee oo tubenga, “U haa'a Te Pabe'e? U haa'a toogoopatu Te Naa Tooa?”⁶² Soo Te Pabe'e mee oo nanekwegea, “Aha, mu oe'yoopana e poonnekwu, nu Te Naa Toogoopatu-kumaba katukwu. Saa'a nu koomeba-naga petuookwu, o'no yise mu e pooha poonnekwu.”⁶³ Soo Jew numu pabe'e yise tubetse unu sutahoose tu kwasu tsakebu'ehoo, mee mu netamma, “Oosoo suda unakwe ka Te Naa-wa'ne'yoo mee naneyugwena. Gi tamme manatusoo oetusoo wahakwutu sookwa'e.”⁶⁴ Mu oo naka ka suda oo unakwe mu sakwa hayoo oetu netamma. Ha'yoo mu sokwama?” Mu numu tutunehanedu mee oo netamma, “Tamme sakwa oo batsa.”

⁶⁵ Yise o kobitoo toohegonno, o poee kwudumowse, oo wupageta, mee yise oo netamma, “Ne tuukwe ka pooha-gana, haga u wupageta?” Mu tutukwutumadu oo-ma tzakaduse, yise oo koba mabatseoo.

⁶⁶⁻⁶⁷ Soo Peter yise ka Jew numu tunehanedu naa nobe-kobena pedana oe yoekatu. Sumu'yoo tsuadumu ka Jew numu tunehanedu naa hemma how yugwegudu, ka Peter meeoo netamma, “U haa'a yise ka Jesus nakatzimodu-matu?” mee.⁶⁸ Soo Peter mee oo nanekwegea, “Nu gi oo sopedakwato.” Soo Peter meewse ka natzakwona'a kumabu wunu.⁶⁹ Soo tsuadumu ka mu numu o konnodu meeoo netamma, “Esoo nana ka Jesus nakatzimodu-matu.”⁷⁰ Soo Peter ka mu numu-ma unu su'ina punno'o mee oo netamma, “Gi nu.” Pudusoo mu numu o toonoobatu meeoo oo netamma, “U tookwa togesapa yow ka Jesus nakatzimodu-matu. U ka Galilee-witu.”⁷¹ Soo Peter meeoo mu netamma, “Gi nu mu numu nemoogadu, nu gi umu-matu.”⁷² Yise tsekana kwu'a waha yaga. Soo Peter ka Te Pabe'e pumme netammana soomayuse, suda soonammena, yagakooha.

15 ¹ Awamooasoo soo mu Jew numu tutunehanedu ka Te Pabe'e batsakwu mee tunehane. Yise ka Te Pabe'e mi tzakunase, ka

teepu-kooba katudu naa, Pilate mee naneadu-kobena oo tzaka petuga. ²Soo Pilate mee ka Te Pabe'e tubenga, "U haa'a ka mu Jew numu-kooba katukwudu?" Soo Te Pabe'e oo nekwege'a, "Aha, nu yow oosoo." ³Mu Jew numu tutunehanedu mee ka Te Pabe'e netamma, "Ewa u suda manakwe." ⁴Soo Pilate yise mee ka Te Pabe'e netamma, "Umu tooe hayoo tooe u netamma. U haa'a gi oo naka, o'no u gi hayoo unakwe?" ⁵Pana soo Te Pabe'e gisoo tuwazoo hayoo sukwe unakwe. Soo Pilate meeo soonamme, "Nu gi o nakasopedakwato ha'oo mane-naga masoo gi mu nanekwege'a."

⁶Nonotsa sumu tomoyina tu na'ewa tukano'o soo numu-kooba katudu sumuoo mu nakwutumadu-matu tzama'wuyakwe, ka mu numu unne-makoosoo. ⁷⁻¹¹Ewa'yoo mu numu ka Pilate-baa petuse, yise meeo oo netamma, "U sakwa sumuoo mu nakwutumadu-matu tzatsebooe." Soo Pilate oo nesopedakwato ka Jew tutunehanedu gi Te Pabe'e soobet zabena, oonne'yoona yise mu numu tutunehanedu ka Te Pabe'e wutuma. Soo Pilate meeo mu tubenga, "Mu haa'a ka Mu Pabe'e Jesus tzama'wukwu?" Mu Jew numu tutunehanedu meeo mu numu netamma, "Mu sakwa ka Pilate ka Barabbas tzatsebooe tuungu." Oosoo nana, Barabbas mee naneadu, tu pupuamu-no nakwutumadu. Umu ka mu Roman numu-no nanagoena, susumudu mu numu-matu nagoehoo.

¹²Soo Pilate mu numu mee netamma, "Esoo nana nu-baa petu, mu Jew Numu-kooba Katudu mee naneadu. How yise nu oo yugwekwu?" ¹³Mu numu wa'agemo'o, "Oo tzakwenne. Oo batsa." ¹⁴Soo Pilate mee mu netamma, "How tubetse suda oosoo manakwe?" Mu numu pabasoo wa'agemo'o, "Oo batsa." ¹⁵Soo Pilate gi oo nebatsapana, yise mu numu puusoo oo nebatsana. Soo Pilate yise ka Barabbas, ka mu tukwutumadu tzama'wu tuunguse, ka Te Pabe'e wupagetase oo batsa, pa'a oo taposa mee tunetamma.

¹⁶Mu tukwutumadu ka Te Pabe'e, ka Pilate nobe-kwitoo tzakaka. No'yoona mu tukwutumadu oe sumuhoobetu. ¹⁷Umu numu-kobena'yoona o wunaga'ayaakuhoo, mono-ga-kwi oo tzowupagaku. ¹⁸Umu oo-ma'yoona naneko'ena, oo nematzamana, mee oo netamma, "U tookwa yow Jew Numu-kooba Katudu." ¹⁹Umu hoope-ma oo kwo-makoo oo wupagetana, oo kobitoo toohena, o-kobena meatzedona oo nasootzamekuna, oo-ma'yoona nanekoena. ²⁰Umu Te Pabe'e nanetza'mekumakwuse, oo namasooapu-wisoo oo matabue. Umu yise ka Te Pabe'e tsakakase, oo batsakwu. ²¹Umu tukwutumadu ka meadabena, Simon^e mee naneadu wegehoo. Mu tukwutumadu ka Simon nenoyukwe ka Te Pabe'e puma nataposakwuna oo tzano tuunguna.

²²Ka Te Pabe'e Numu Tzonoho mee naneadu-kwi o bi petuga. ²³Yise umu atsa tutza'emukwa baa, noko natusooabe mayuana oo tooe hebe tuungu, soo Te Pabe'e yise gi oo hepe. ²⁴⁻²⁵Yise awamooa umu oo mi-makoo pa'a oo taposa. Mu tukwutumadu yise oo kwasu nanatotsakwate. ²⁶Ka sunngabe namadabue-

e 15:21 Esoo nana oo natzano tuungudu, Simon mee naneadu. Oo doodooamu Alexander noko Rufus mee nananeadu. Cyrene mee naneadu-kwi tubewa-ga'yoo.

ma puma oo nataposana meeo natubo'o, "Yow esoo Jew Numu-kooba Katudu." 27-28 Waha'yoo tutuduhadu punno'o ka Te Pabe'e na'enakwana nataposa.

29 Mu numu oo-moopa meagonna, oo-ma'yoo naneko'e mee unnena, "U meeo unnepu, u Te Naa nobe wudyoomase, pahe tabewa-wi besa oo matabuekwusoo. 30 U sakwa ka unu tumadina mama'yoo wuekese, uuso namagwetzo." 31 Umu numu tutunehanedu oo-ma'yoo naneko'e mee unnena, "U mu numu magwetzoise, pana yise gi hownnekoo uuso namagwetzo-wa'ne'yoo. 32 Hownne'yoo Ne Pabe'e U? Gi hownnekoo uuso namagwetzo-wa'ne'yoo, ka naduyana mee unnepana. Uuso yaa teepu-matoo wuese, numme u naka'oedyukukwu." Umu punno'o oo na'enakwa nataposadu oo-ma'yoo naneko'e.

33 Tabeno manakwana oona ka taba pahe-kwikoo tooe, ka teepu-koobakwitu toganopunne. 34 Pahe-kwikoo tapuakese soo Te Pabe'e paba wa'age yadoo, "Eloi, Eloi, lama sabachthani," mee na'unnedu, "Nuga Naa, Nuga Naa, How manena u e matusookwuna'e?" 35 Umu susumudu o konnopunnedu-nagatu mee unne, "Masoo tookwa ka Elijah, o'nosoo Te Naa yadooawabe mee naneadu bidyakwe." 36 Sumu'yoo umu-nagatu yabesoo tanomanegase, yise yotsogadu wanapu, suda kammadu baa oodutsekoo hoope-ma oo tztzabekuse, ka Te Pabe'e tzatumakute. Pana mu susumudu meeo, "Oo tsasoopeya. Sumuna soo Elijah tamme-baa tabua petuse oo magwetzoikwu." 37 O'no soo Te Pabe'e paba wa'age, ya'eo.

38-39 Soo tukwutumadu ka Te Pabe'e poonne ka oo ya'ehoose, mee yise unne, "Masoo tookwa too'e togesapa ka Te Naa Tooa'a." Soo wunapu ka Te Naa pooha pukwi'yoona numu nanesootuhidu-makoo naamootoo natzakwenedu, ka Te Pabe'e ya'ehoose, soo wunapu pa'anakwana tubongo oo naamootoo natzagebu'ehoo. Soo teepu yutsungakoohase, mu tupe payooagonna sawekooha.

40-41 Ewa'yoo momoko'ne punno'o onow kwina'a konnopunnena oo poonnepunne, umuoo ka Galilee-wi'yoona ka Te Pabe'e-no kemmapu oo tummatzina. Umuoo momoko'ne-nagatu pahe'yoo, Mary Magdalene, yise Mary mu James noko Joseph pea, yise tuwazoo Zebedee nodukwa.

42-43 Soo nana, Joseph mee naneadu, Arimathea-wikoo nobe-ga'yoo, ka numu tutunehanedu-matu, unu napetzabedu. Toogoopatu Te Naa ka teepu besa oo yugwekwunu wutooedu. Ka tu pudu yongoga'a soo Joseph ka Pilate nobe-kwi petuga yise oo tubenga, "How sakwa u ka Te Pabe'e tookoo e tzagea?" 44 Soo Pilate mee unakwe, "Soo Jesus haa'a tubetse ya'epu?" Soo tukwutumadu nabise, yise natubenga, "Soo Jesus tubetse ya'epu haa'a?" Soo tukwutumadu, "Aha," mee unakwe. 45 Yise ka tukwutumadu nakase, soo Pilate ka Joseph mee oo netamma, "Yise a haneka." 46 Soo Joseph yise ka Te Pabe'e tookoo tzakwekuse toha wunapu hane petuse, oe oo manobea. Tupe tuwaga-kwi oo tugu. Pabow tupe o-kobenatoo tonanoohoo. 47 Umu Mary Magdalene-no, Joseph pea Mary mee naneadu, ka Te Pabe'e natugu-kwitu poonnepunne.



Soo wanapu naamootoo natzakebue (Mark 15.38-39)

16 ¹⁻²Sumu tabe mease, oogow mooa awamooasoo taba pudu tseboogena, pabe'yoo momoko'ne ka Te Pabe'e natugu-kwitoo mea'a. Mary Magdalene, James pea, yise Salome-no. ³Yise ka o meadabena meeoo unnemena, “Haga yise ka pabow tupe o-kobenatu tonanooekwunikwu?” ⁴Yise toogoonakwatu poohwise, soo paba'yoo tupe mooasoo natonanooekwunipu. ⁵Oe mu tzoonoose sumu'yoo tooebetse toha kasa-ga'yoo Te Naa tutummatzimatuu, toha namasooana o katu. Mu momoko'ne oo-ma suiho. ⁶Soo tooebetse mee mu netamma, “Mu sakwa gi sui pana. Mu ka Te Pabe'e Nazareth-witu wate; oosoo nabatsapu, oosoo kadoo'oo yaatu; mooasoo namayodapu. Poonne yaa oo habepu-witu kadoo'oo. ⁷Mu sakwa mease, Te Pabe'e nakatzimodu tuukwe, Peter tuwazoo. Mooasoo soo Te Pabe'e mu mooenakwasoo Galilee-witoo meapu. Onoko yise mu oo poonekwu, mooasoo mu natuukwepu.” ⁸Umu momoko'ne yise o'no tatanomanega. Gi haga umu-matu sukwe yadoo'a, umu ka suihoose.

⁹Soo Te Pabe'e tu ya'e-kwi'yoona namayodase, unu awamooasoo ka Mary Magdalene natzapoonneku petu, ka Mary Magdalene-nagakoo natakwatsukwuoo (7) tsoapa ta'yakwunipu-ga'yoo ka o'nosoo. ¹⁰Mary saa'a ka umu Te Pabe'e nakatzimodu-matoo meahoose yise mu tuukwe petuga,

umu yise oe'yoopana sagwa'e. ¹¹“Te Pabe'e pudu namayoda. Nu o poonne,” mee mu netamma. Umu Te Pabe'e nakatzimodu gi oo naka'oedyukute.

¹²Soo Te Pabe'e atasoo tabuana, waahoo nanana nobe-kwitoo me'a. Yise umu-no manega. ¹³Umu ka Te Pabe'e sopedakwatoohoose punowsoo memeahoo mu tunakatzimodu tuukwe petuga. Pana umu tunakatzimodu gi mu naka'oedyukute.

¹⁴Penakwa mu Te Pabe'e nakatzimodu tuka, soo Te Pabe'e mu natzapoonneku, mee yise mu netamma, “How manena mu gi oo naka'oedyukute, tooe ka umu numu mumme tuukwe'e sapa? ¹⁵Ka tooe hano tooe yaa teepu-kooba momona, mu sakwa ka Te Naa besa yadooapu wahamo, no'obatusoo numu tuukwe. ¹⁶Mu gi tunaka'oedyukudu, ka gi tookedu goso-witoo meakwu. Umu oe tunaka'oedyukudu yise baa-wi namatzakana namagwetzoikwu. ¹⁷Umu oe unu tunaka'oedyukudu toogoopatu yadooamasoo yadooakoohakwu. ¹⁸Tooe togogwa tuwazoo mu tokuese, tootoo mu sutakoo hebehoose sapa, mu gi nuummaba wuma-wa'ne'yoo. Yise mu umu-kooba matuguna, mu nanesootuhikuna, mu tuoegoedu besa manekwu.”

¹⁹Soo Te Pabe'e umu-no yadooamakwuse, yise toogoopatoe tseboogase, ka Te Naa tumadinakwa katu petuga. ²⁰Umu Te Pabe'e nakatzimodu tooe hano tooe numu besa o unnena tuukwemo'o, nanabesa tu tumadina pumme tu sootuhipu mu tzapoonekute. Esoo toge sapa. Maa'no sapa.